

0 1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 2



大集月藏經卷第

高齊天竺三藏那連提耶舍

月輪神咒品第一

外是我
與大正
經悉得
衆無量
衆說日
波頭摩
花婆利
佛說日
衆說日
波頭摩
花婆利
佛說日
衆說日
波頭摩
花婆利

善也世嚴華嚴經
意也字樣不相符出類
存疑者敬請取中
案此處是花婆利
天竺文

C40
4514
33

0 6483

了翁上座請大猷及有
家書置之武州紫雲山
我微笑塔院庑府中永
為學者不敢許出院內
當山二世鐵牛機謹誌

大方等大集月藏經卷第一

高齊天竺三藏那連提耶舍譯

月幢神呪品第一

如是我聞一時佛在佉羅帝山牟尼諸仙所依住處
與大比丘衆有學無學六百萬人於諸煩惱堅牢纏
縛悉得解脫唯勤方便永斷習氣及諸菩薩摩訶薩
衆無量無邊不可算數不可稱計悉得忍力化諸龍
衆說日藏經已卽轉西方現大花雲所謂優波羅花
波頭摩花拘牟陀花芬陀利花阿提目多花瞻波迦
花婆利師迦花如是花雲悉皆來現其花雲中現一



C40-4574

B 64853

半月廣十由旬於半月中復現真金重閣講堂莊嚴
微妙其堂光明過百千萬億日月光明其光悉照佉
羅帝山復現種種奇異花雲所謂優波羅花乃至波
利師迦花其花光艷照牟尼仙所依住處又復現於
七寶五柱重閣講堂甚奇微妙隱蔽日月光不能現
於其堂中復現半月於半月中有於千葉青色蓮花
其花臺上復有世尊端坐說法其光普照一切大衆
一一頭上皆現半月微妙天鬘復雨種種寶種種花
種種香爾時慧命大目犍連見如來等神通變化生
希有心又知大衆心有所疑從座而起偏袒右肩右

膝著地合掌向佛而說偈言

唯佛悉除諸煩惱	於盲冥中能覺悟
為羣生故閉惡趣	令諸衆生住善道
唯佛降伏諸億魔	令諸外道失光顯
調伏衆生住檀尸	枯涸衆生煩惱海
八功德水令洗浴	以覺分寶濟衆生
無量億衆入涅槃	能轉無上法輪寶
一切所有諸龍衆	為瞋所使行諸惡
渴愛所逼無有慈	唯佛能益令歸信
四天下龍皆來集	一心歸於佛法僧

盡諸業障及煩惱

皆護正法而安住

於此復現妙花雲

中有半月光照曜

一切現此半月鬘

今當欲有何佛事

積此諸花如大山

雨諸香花及眾寶

大眾觀瑞心有疑

當欲雨於何法雨

此處微妙最第一

如此大眾皆依住

於諸過佛修供養

是人師子如是來

爾時佛告大目犍連西方有世界名月勝佛號日月
光有月藏童真菩薩摩訶薩將諸眷屬八十億那由
他百千菩薩摩訶薩欲來向此爲欲見我禮拜供養

與大眾集說欲隨喜又欲付囑諸天龍夜叉乾闥婆
等法眼故應時月藏菩薩摩訶薩與其眷屬八十億
那由他百千菩薩摩訶薩從彼世界來至佛所頭面
禮足右遶三匝住立佛前皆悉合掌一音說偈

吉祥無數劫

所修爲眾生

吉祥見眾生

生死苦所逼

吉祥以檀施

大仙作饒益

吉祥能行施

超越於人天

吉祥護淨戒

衆生不能動

吉祥令怒者

住於慈善心

吉祥發勇進

度脫懈怠者

吉祥離惡道

安置於善趣

吉祥善修忍

容恕怒惡心

吉祥希有事	是故悉歸依	吉祥修諸禪
諸天生希有	吉祥悉枯竭	衆生諸苦海
吉祥熏修智	追廻惡道輪	吉祥上菩提
到最難到處	吉祥降魔衆	建立正法幢
吉祥所轉者	最是正法輪	吉祥愍異空
降伏諸外道	吉祥降法雨	充足渴世間
吉祥作明證	天人乾闥婆	吉祥滿世界
我爲最上師	吉祥安四果	應受世供養
吉祥令億衆	安處於涅槃	吉祥久時住
法眼所建立	吉祥久住世	世間無與等

吉祥善提果	衆今獲大利	吉祥爲衆生
宣說無上法	吉祥以法水	洗浴諸衆生
吉祥善能度	是諸天人等	吉祥能顯現
無垢真妙法	吉祥除衆生	所有諸煩惱
吉祥諸僧衆	世間最第一	吉祥善生世
能益於人天	吉祥令四衆	明淨善光顯
吉祥令四衆	全護戒律儀	吉祥行檀捨
持戒及精進	吉祥修忍禪	及以妙般若
吉祥大梵王	娑婆世界主	吉祥大魔王
諸欲自在王	吉祥憍尸迦	輔佐諸眷屬

吉祥諸天衆	及諸宮殿等	吉祥毗沙門
及諸夜叉衆	吉祥提頭賴	眷屬乾闥婆
吉祥毗樓勒	并與鳩槃荼	吉祥毗樓博
及諸龍軍衆	吉祥日月天	星辰及諸宿
吉祥大自在	兒及造界主	吉祥風火神
及以地神等	吉祥諸龍衆	及以阿修羅
吉祥諸羅刹	及與緊那羅	吉祥迦樓羅
摩睺羅伽等	吉祥雨甘雨	行雨大神王
吉祥護持國	一切人中王	吉祥婆羅門
刹利毗舍陀	吉祥所供養	最勝尊導師

吉祥願聞者	真正無過法	吉祥諸現未
供養三寶者	吉祥一切衆	滅除諸煩惱
吉祥諸衆生	同住於正法	吉祥檀尸羅
精進之彼岸	吉祥禪那度	忍辱波羅蜜
吉祥諸一切	到彼智岸者	吉祥令諸病
一切皆除愈	吉祥皆休息	一切濁惡世
吉祥諸衆生	願令悉解脫	吉祥令一切
悉得諸無漏	吉祥於大地	種子所生者
吉祥諸禾稼	藥草樹林果	吉祥被一切
依時悉成熟	吉祥勝地精	一切處充滿

吉祥人精氣 一切皆安住 吉祥法精氣

充滿一切衆 吉祥皆休息 一切諸罪惡

吉祥令衆生 而得勝菩提 吉祥於諸法

自在到彼岸 吉祥正法雨 普潤諸衆生

吉祥諸衆生 悉度於三有 吉祥令一切

悉證大涅槃

大德婆伽婆我今欲說吉祥章句大力神呪如是神呪過去諸仙之所宣說建立守護善能增長吉祥之事能除一切罪垢惡見入諸善根增長大悲以此呪句悉得資益一切衆生乃至一切麀鹿鳥獸所得聞

者令如是等心得安隱離濁惡世一切諸障衆生障法障如是等障皆悉休息一切善根隨所觸法令得入心念慧堅固名稱形色人所喜樂勇健無畏於十善業道堅固安住檀波羅蜜乃至般若波羅蜜四念處乃至十八不共法堅固安住大慈大悲大方便力一切種智乃至究竟無上涅槃堅固安住除其造作五無間業誹謗正法毀訾賢聖斷常二見唯除如是諸罪人等是吉祥句常爲先聖建立加護如此呪句亦復能令諸天信受得人十善業道亦令得人檀波羅蜜乃至般若波羅蜜四念處乃至十八不共法大

慈大悲大方便力乃至一切種智無上涅槃復能令
彼諸魔眷屬悉得歸信諸神龍王夜叉羅刹阿修羅
乾闥婆緊那羅迦樓羅摩睺羅伽餓鬼毗舍闍刹利
婆羅門毗舍首陀令人十善業道檀波羅蜜乃至般
若波羅蜜大慈大悲大方便力四念處乃至十八不
共法一切智一切種智無上涅槃唯除五逆誹謗正
法毀賢聖作是語已而說呪曰

多地夜他旃達利 旃達囉毗提 旃達囉磨咩

旃達囉婆婆犀 旃達囉跋帝 旃達囉不梨 旃

達囉婆吟 旃達囉差帝梨 旃達囉闍移 旃達

囉頰寄 旃達囉底梨 旃達囉跋咩 旃突嚵

旃達囉婆囉吟 旃達囉勿達梨 旃達囉娑地移

旃達囉娑咩 旃達囉佉祇 旃達囉因達梨

旃達囉惡差 旃達囉利鞞 旃達囉簸利鞞 旃

達囉跋徙 旃達囉悉那帝 旃達囉簸鬚 旃達

囉頰泥 旃達囉祇梨 旃達囉博差 旃達囉悉

泥吟 旃達囉盧咩 旃達囉鳩閉 旃達囉娑閉

旃達囉受婆隸 旃達囉賓滯 旃達囉惡差

旃達囉敷帝 旃達囉伽泥 旃達囉什鞞 旃達

囉悉鉢尸 旃達囉磨泥 旃達囉跋帝 迷底喇

經

大方廣華嚴經

卷

一

經

大方廣華嚴經

七

一

耶跋帝 迦樓拏跋帝 薩底耶跋帝 多鬚耶跋
帝 差耶跋帝 扇多跋帝 底囉跋帝 旃達囉

盧寄 藪婆訶

世尊如此神呪過去諸佛牟尼仙聖建立守護如此
神呪名月幢月能令衆生悉得吉祥歸信三寶滅除
一切諸惡重罪乃至逮得無上涅槃月藏菩薩說是
呪時三千大千世界六種震動依欲界色界一切衆
生皆大戰悚驚怖不安于時諸天雨種種寶種種花
種種香種種末香種種衣服種種卧具種種瓔珞雨
如是等種種物時如是諸物互相接觸出於種種妙

法音聲謂三寶聲三律儀聲三解脱聲三明聲三學
聲離三界欲聲三種菩提聲無常聲苦聲無我聲空
聲不希望聲離喜聲無性聲如體性聲實際聲法界
聲如如聲不去不來聲無處不建立不退轉不行無
窟宅無所依發精進聲檀波羅蜜聲乃至般若波羅
蜜聲慈悲喜捨四念處乃至八聖道分聲奢摩他毗
婆舍那聲四攝聲四無礙聲攝受正法聲因緣法聲
護正法聲如幻如夢如影如響如水中月隨諸衆生
應得度者而攝受之厭離流轉出向空閑阿蘭若處
爲他說者已自行之不相違背悉皆如法堅固安住

而求一切善根聲十地聲無生忍聲十八不共法聲一切種智聲轉法輪聲生死流轉令住八聖道不隨流轉聲降伏四魔令人無餘涅槃聲聞是聲已此三千大千世界衆生及地獄衆生等於彼一切諸衆生類一一衆生皆以前身親善知識因緣力故隨其差別所種善根若檀若尸若修禪定若於聲聞及緣覺乘發心起願若於無上大菩提果發弘誓願於彼衆生隨本所習如前諸聲悉入其耳隨其善根曾所修行造作業緣皆能憶念此宿命事愛重敬信佛法僧寶速來歸依彼衆生中自有業障悉得除盡於彼命

終一時生天及生人間俱至佛所而坐聽法如是畜生餓鬼亦悉來集皆是先業親善知識因緣力故種善根故若檀若尸乃至業障而得盡滅其中亦有卽身來至佛所聽法亦有於彼命終生於天人來詣佛所聽受正法如是人天悉來佛所唯除魔王及諸眷屬四阿修羅王并其眷屬于時三千大千世界地平如掌當於爾時須彌山鐵圍山大鐵圍山黑山是等諸山大海樹林皆悉不現唯除佉羅帝山其山廣博如十四天下於中人與非人間無空處上方亦如十四天下無量不可計無有邊際於虛空中大衆充滿

續
佛地
爲見佛故禮拜供養故成熟衆生見大衆集爲聽法
故而來集會此三千大千世界隨其所有宮殿舍宅
林樹藥草莖葉花果衆雜寶物如是一切皆悉變成
半月而現於彼一一半月之中出是色光如千日月
和合光明遍照三千大千佛土如是色相廣大莊嚴
是時十方無邊佛土一切皆現於彼佛土菩薩摩訶
薩釋天王梵天王及餘天王龍王夜叉王緊那羅王
一切神王承佛威神得見此佛及大衆集復見如是
妙色光明見已皆悉發意欲來承佛神力於一念頃
卽至佛所禮拜供養至心聽法爾時月藏菩薩摩訶

薩以天寶末天花天香天鬘天衣散於佛上三遍散
已右遶三帀住立佛前合掌白言大德婆伽婆我有
罪過不及於此大衆集會十方所有菩薩摩訶薩於
此悉集我有因緣後來至此大德婆伽婆我在本國
月勝世界與諸眷屬七日之中入阿頗那迦定從定
起已卽問日月光如來大德婆伽婆徒衆眷屬今何
所去日月光佛卽答我言善男子東方去此過百千
億佛世界已次有世界名曰娑婆彼土有佛號釋迦
牟尼如來應供正遍知住世說法未入涅槃今於彼
處大衆集會十方諸佛國土所有菩薩摩訶薩一切

皆集於彼世界爲見釋迦牟尼佛禮拜供養聽大集
經故我眷屬亦復往彼汝今亦可詣彼佛所禮拜供
養說月幢月呪以是因緣我來在後是時月藏菩薩
而說偈言

唯佛獨是衆生父

於煩惱火而救拔

我今謝過最勝佛

以我因緣後來故

唯佛人天作大明

普照十方諸國土

我今謝過佛法王

以我因緣後來故

唯佛能示涅槃道

趣惡道者追令廻

謝過牟尼大商王

以我因緣後來故

唯佛世間大醫師

於失明者與法眼

謝過最勝大醫王

以我因緣後來故

唯佛能示諸船楫

令衆生渡四疾河

謝過人中最勝者

以我因緣後來故

唯佛慈雲降法雨

洗衆生意煩惱垢

謝過大聖勝法尊

以我因緣後來故

唯佛一人於四流

能渡衆生三有海

謝過世尊實語者

以我因緣後來故

唯佛開諸正法藏

以七聖財濟衆生

謝過天勝法施主

以我因緣後來故

唯佛能與衆生眼 於無明闇拔盲瞽

我本端坐一三昧 阿頗那禪心安住

我不見佛現神變 以我因緣後來故

佛言善哉善哉善男子汝大精進能於七日入深禪
定如是妙定是大丈夫住處是如來住處無上住處
善男子汝及眷屬七日安住阿頗那迦禪以是義故
今悉成就無量億那由他百千諸天龍王夜叉阿修
羅緊那羅人非人等於阿耨多羅三藐三菩提除其
業障衆生障法障禪障煩惱障覺分障悉滅無餘彼
諸衆生有得不忘菩提心三昧者於無上道不退轉

者復有衆生於一切佛法得大明忍彼等衆生以此
善根不久於阿耨多羅三藐三菩提而成正覺如是
善男子汝以七日入禪定故一時能滅衆生大苦令
得成就大福德聚善男子若有衆生唯依讀誦欲求
阿耨多羅三藐三菩提者是人多喜著於世俗以世
俗故尚不能調已心煩惱何能調伏他人煩惱善男
子善女人樂著讀誦求菩提者便有嫉妬求名利富
貴高心自是輕慢毀他以自高故尚不能得欲界善
根何況能得色無色界一切善根又不能得聲聞菩
提何況能得辟支佛道及無上菩提何以故第一義

諦阿耨多羅三藐三菩提不與聲聞辟支佛共是故
非以世俗能得阿耨多羅三藐三菩提最勝善根大
福德聚善男子譬如星火不能枯竭甚深大海如是
如是善男子不以世俗能竭自身煩惱大海何能竭
他衆生煩惱善男子譬如一人人口所吹風不能損壞
世界大地如是善男子不以世俗能成就大慈大
悲善男子譬如藕絲不能稱動須彌山王如是善男
子不以世俗能自滿於阿耨多羅三藐三菩提智何
能令他得第一義如是善男子能成就阿耨多羅三
藐三菩提智者非世俗也何者是第一義所謂修造

一切福事若修福者亦當數數熏修身心若修身者
則能修心能修心者則能修慧若能修身心修慧如
是之人則能速滿六波羅蜜能以四事攝諸衆生成
熟於阿耨多羅三藐三菩提成等正覺不以世俗也
於世俗中復有衆生計斷常二見者非第一義復有
衆生於世俗中我見邊見亦非第一義復有衆生於
其世俗求現世樂及後世樂亦非第一義而我不見
更有一法能盡業障乃至煩惱障一日一夜令無量
億那由他百千衆生悉得敬信佛法僧寶成熟安住
無上大乘若有禪士雖復持戒不能具足禪法不周

未得三昧是人於禪若坐若行初夜後夜得與禪定相應而住則能除斷無量業障能令多億那由他百千衆生悉得歸信成熟菩提種種善根福德之聚況具持戒得真法三昧諸陀羅尼忍得四梵住宴坐寂定於七日中所得福德不可思議不可爲喻何況能除衆生障煩惱障等盡滅無餘乃至成熟無量衆生向阿耨多羅三藐三菩提亦能積集無量福聚又能滿足六波羅蜜何以故是修禪者若行若坐除諸障法令心清淨於一切行捨攀緣想是檀波羅蜜於捨攀緣想常不休息是尸波羅蜜於諸境界不生瘡疣

是羸提波羅蜜不捨於離是毗梨耶波羅蜜於諸事中心不放縱是禪波羅蜜諸法體性無生樂忍是般若波羅蜜復次若於境界不起擾濁是檀波羅蜜若於境界無有瘡疣是尸波羅蜜若於境界不能染汙是羸提波羅蜜若於境界無有動轉是毗梨耶波羅蜜若於境界無有計念是禪波羅蜜若於境界一向清淨行是般若波羅蜜復次於諸陰捨是檀波羅蜜於諸陰不計念是尸波羅蜜於諸陰求無我想是羸提波羅蜜於諸陰起冤家想是毗梨耶波羅蜜於諸陰不令熾然是禪波羅蜜於諸陰畢竟棄捨是般若

波羅蜜復次於諸界捨是檀波羅蜜於諸界不擾濁
是尸波羅蜜於諸界捨因緣是羸提波羅蜜於諸界
數數棄捨是毗梨耶波羅蜜於諸界不起發是禪波
羅蜜於諸界如幻想是般若波羅蜜復次菩薩於諸
衆生起於慈心是檀波羅蜜於諸衆生心無憎愛是
尸波羅蜜於諸衆生起於悲想是羸提波羅蜜於諸
衆生起救濟想是毗梨耶波羅蜜於諸衆生以喜攝
想是禪波羅蜜於諸衆生不作彼此吾我等想是般
若波羅蜜復次菩薩於諸衆生以法施之不生二想
是檀波羅蜜於諸衆生柔和愛語是尸波羅蜜於諸
衆生不起諸惡是羸提波羅蜜於諸衆生愛語不退
是毗梨耶波羅蜜於諸衆生利益憐愍是禪波羅蜜
於諸衆生同行其法是般若波羅蜜復次菩薩安置
衆生於諸善處是檀波羅蜜於一切法而不依倚是
尸波羅蜜於一切法以一道入是羸提波羅蜜於一
切法及一切難無擾濁想是毗梨耶波羅蜜於一切
法而不分別是禪波羅蜜能以一字入一切法爲衆
生說是般若波羅蜜善男子如是菩薩摩訶薩以此
第一義甚深法要能滿六波羅蜜非世俗也如是如
是善男子諸菩薩摩訶薩等第一義諦善巧方便皆

以此法自爲爲他勤修令滿六波羅蜜速於阿耨多
羅三藐三菩提而成正覺如是十方現在諸餘世界
所有菩薩摩訶薩等第一義諦善巧方便一切皆悉
以此道法速於阿耨多羅三藐三菩提而成正覺當
來十方無量阿僧祇諸佛世界諸菩薩摩訶薩等皆
悉勤修如是甚深第一義諦善巧方便修六波羅蜜
能於阿耨多羅三藐三菩提而成正覺非世俗也彼
諸菩薩摩訶薩爲法眼久住紹三寶種使不斷絕勤
求修學爲一切衆生執大明炬而作照明令其止息
煩惱道苦道與其慧眼令度一切三有流轉安置無

上菩提之道彼等於聖法默然初夜後夜捨得相應
善能出生三昧正受與三解脱門相應而住善男子
汝今七日於阿頗那迦禪而入定故成熟無量諸衆
生故是故勸汝及諸善女人等若現在世未來世未
世於我法中初夜後夜常與於捨相應而住以正法
眼而作照明紹隆三寶使不斷故爲成熟衆生故勤
修如是第一義諦爲滿六波羅蜜勤修而住佛告一
切諸天人衆龍神夜叉應當養育供給是人衣服飲
食臥具湯藥隨其所須盡給與之亦當守護除其災
橫離諸凶衰殃惡疾病悉令除滅何以故與禪相應

者是我真子從佛口生從法化生若有施主天龍夜
又能於現世及未來世與捨相應以第一義諦爲滿
六波羅蜜故爲除衆生諸煩惱道及苦道故法眼久
住紹三寶種使不斷故汝等施主天龍夜又皆應護
養并與衣服飲食臥具病瘦湯藥隨其所須盡給與
之亦應勸請及以讚歎以彼施主天龍夜又持我正
法爲欲令我法眼久住紹三寶種使不斷故如是等
輩是我真子從佛口生從法化生故比丘比丘尼優
婆塞優婆夷及餘清信士若善男子善女人以第一
義乃至求於阿耨多羅三藐三菩提者及養護者我

以彼等寄付於汝彌勒爲首及以賢劫諸菩薩等當
以四事攝受勸化授其禁戒復令住於四無量心四
禪四無色定大方便力大慈大悲乃至十八不共法
當復授與無上道記爾時彌勒菩薩摩訶薩以爲上
首及與賢劫諸菩薩等白佛言世尊如是如是大德
婆伽婆我當護念彼諸衆生乃至與其授於阿耨多
羅三藐三菩提記若現在世及未來世乃至法住是
諸施主作大明者亦當與授無上道記天龍夜又捷
闍婆等於阿蘭若處靜默修行求第一義者信樂受
持供養供給衣服臥具乃至湯藥隨所須者爾時世

尊欲重明此義而說偈言

於此世間一日出	無量億花悉開敷
如佛一人出世間	衆生所希福花現
若欲速得十勝力	及度堅固誑煩惱
復欲速得最勝定	靜默獨住阿蘭若
欲得人天信敬受	及除心之煩惱渴
欲斷於心苦重擔	安心聖道奢摩他
若欲排却諸惡難	及諸功德自莊嚴
於諸苦海欲自渡	應當安心妙菩提
若欲得彼七法財	及欲得於方便忍

欲爲衆生說妙法	常當樂住阿蘭若
六根常與三昧合	應當寂住阿蘭若
少欲頭陀善知足	此人能入賢聖道
若能速捨五欲樂	得五力故滅煩惱
若於五道度衆生	自捨過惡住三昧
若欲得於四無量	及得無礙四辯才
欲得四禪彼岸處	是人應修第一義
若欲速知於三有	欲知諸法苦無常
及知諸行性相空	應當樂住阿蘭若
若欲速知二種法	毗婆舍那奢摩他

及欲速知有為過
 獨住閑靜不放逸
 以精進求第一義
 若欲枯竭膿血海
 若欲速竭三有海
 若欲成熟衆生海
 若欲得知生死際
 欲知本生及居處
 以諸方便樂閑靜
 若欲遊戲禪定海

要當住於菩提心
 便能疾捨於世諦
 能速捨離諸惡道
 及欲枯竭煩惱海
 常與聖種心相應
 若欲滿諸大願海
 如救頭然處閑靜
 久遠微細所從來
 攝心於彼得三昧
 若欲覺悟神通海

若欲渡於渴愛海
 若欲得飲正法海
 若欲見於諸佛海
 欲得如是勝功德
 當離衆惱住蘭若
 若人百億諸佛所
 若能七日在蘭若
 若人讀誦十億法
 若於七日在蘭若
 若人多歲營僧事

若欲得於天中最
 若欲見於莊嚴土
 欲問甚深諸義海
 及欲速得勝菩提
 以此得道亦不難
 於多歲數常供養
 攝根得定福多彼
 及解妙義如佛說
 三昧福聚轉多彼
 更不造作餘種業

若能七日住蘭若 其人福聚多於彼
爲衆說法解深義 於多年歲無餘業
若能七日心住寂 其福德聚不可數
若人營造多佛塔 伽藍田業給施僧
若能七日在蘭若 其福轉多勝於彼
閑靜無爲佛境界 於彼能得淨菩提
若人謗彼住禪者 是名毀謗諸如來
若人破塔多百千 及以焚燒百千寺
若人毀謗住禪者 其罪甚多過於彼
若有供養住禪者 飲食衣入湯藥

是人消滅無量罪 亦不墮於三惡道
是故我今普告汝 欲成佛道常在禪
若不能住阿蘭若 應當供養於彼人
若能住禪不放逸 則能速滿於六度
欲求大明菩提道 以此方便疾能到
欲求菩提住寂靜 當捨一切諸緣業
及離煩惱捨諸樂 則能速到檀彼岸
若捨境界陰界入 及捨貪瞋愚癡過
棄諸煩惱修善業 以此能到檀彼岸
當以慈悲念衆生 息諸分別不自是

常能憐愍諸衆生
勤捨罪業修諸禪
愛語方便常求禪
境界不動不味著
一道清淨不移動
於境界中不念慮
諸法離掉無分別
陰界如幻無起作
善修了知如是法
故我今告一切衆

則滿尸羅波羅蜜
亦當捨諸陰界入
除障到於精進岸
爲捨因緣修悲喜
以此得滿忍辱度
離嫉不樂得於喜
不染不愁是爲捨
相續修行不斷絕
以此得滿般若度
若有欲除諸罪業

求忍三昧陀羅尼
若欲超越聲聞乘
又欲疾得勝佛地
若心攝住阿蘭若
於是能捨一切罪
當得作佛三有最
枯竭衆生諸惡趣
當捨惡見諸緣事
應當速向蘭若處

當知如是住寂靜
及欲超越緣覺乘
應當速住阿蘭若
以此卽是供諸佛
是則能滿於六度
能轉清淨正法輪
度脫衆生三有海
當發最勝菩提心
於彼當成如是德

爾時世尊說此經時諸會大衆聞是甚深第一義禪

有於過去善修習者九萬二千人得無生法忍七十億那由他百千衆生得種種三昧諸陀羅尼及無生忍八萬一千人得受阿耨多羅三藐三菩提記如恒河沙等衆生未發無上菩提心者悉皆發心於阿耨多羅三藐三菩提得不退轉

大方等大集月藏經卷第一

音釋

毀咎

毀許委切謗也咎將几切口毀也

戰悚

戰之膳切慄也悚息拱切懼也

振觸

振直庚切挨也亦觸也觸尺玉切抵也

瘡疣

瘡初良切瘍也疣羽求切癩也

金沙居士王納吾捐資刻此 大方等大集月藏經卷第一 計字七千三百三十八 簡該銀兩四錢零三厘 伏願生生契悟妙心世世嘗聞正法 丙戌年五月日識

大方等大集月藏經卷第二

高齊天竺三藏那連提耶舍譯

魔王波旬詣佛所品第二

爾時復於魔王宮中所有一切諸雜林樹果實華葉衣冠瓔珞莊嚴之物皆悉變成半月而現放大光明照魔王宮內外明徹琴瑟箏篪一切樂器及非樂器寶莊嚴具及餘諸物自然演出如是偈句

世間無等大導師

於諸法中最自在

今住佉羅帝迦山

為衆顯示佛法海

開說一道清淨法

聞者必得勝菩提

波旬獷戾你不如 令汝魔界悉空無
汝本曾作一耶若 今得如是自在報
汝今法應當退落 何不速去見導師
一切所來諸衆生 曾作耶若千億數
福藏大衆皆來集 聽受最上無病法
各各向佛心敬仰 見尊導師修供養
以其淨信滅煩惱 更不重生於欲界
專信禮拜尊導師 滅三界苦煩惱縛
億世受於勝妙報 速與三界爲親友
又於三界作法王 說真實法度衆生

一切諸法如水泡 有爲相現猶如幻
福報無常悉空無 當疾捨離我見過
速發無上菩提心 以此定受勝妙福
爾時魔王波旬及諸官屬見聞是已驚怖戰悚從牀
而墮兩手掩耳而作是言當觀沙門作此幻惑必奪
我等諸魔勢力令諸色像悉成半月復出如是種種
音樂沙門瞿曇現大神力盡攝欲界以爲已有可速
擊鼓集諸大衆皆到此處作是語已於其宮中卽便
擊鼓擊彼鼓時於其鼓中卽出如是音聲偈句
諸法空寂風和合 遠離所依衆色像

於作無用誑衆生 事相詐現猶如幻
和合因緣故成字 如書虛空字不住
陰界空寂離衆色 無常義現不自實
聲塵入於耳根門 無常義現不暫停
其識如幻若分別 顯現無我不自在
眼根迅速故空寂 是苦自性義相應
鼻根香塵與舌味 身根及與一切觸
心法竝與無常俱 迷惑衆生無所覺
如是六境生諸苦 能令失壞涅槃道
以是凡夫轉五趣 不能離縛得解脫

於諸境界除渴愛 則能速到勝妙處
此心自性清淨相 觀是了知菩提道
若已境界得自在 則能悲愍一切衆
於彼當得檀戒忍 智慧功德自莊嚴
得最無上菩提智 能度無量諸衆生
說此偈時魔之宮殿一切衆生驚怖不安男夫婦女
童男童女迭共相喚詣魔王所住立其前魔王以偈
告彼衆言

汝等悉見此魔宮 如是無量極醜惡
諸聲不息生大苦 定奪我等魔勢力

沙門瞿曇作是聲

欲滅魔力境界事

可速往詣瞿曇所

咸共讚歎而歸依

爾時魔子名鴛瞿羅歌卽以偈頌而白父言

我今嚴駕著鎧鉀

將諸勇健鬪戰士

弓刀矛稍及刀輪

刀面鼓面諸獸面

魔軍夜叉龍修羅

及諸眷屬滿虛空

速詣惡心瞿曇所

碎滅令彼如灰塵

爾時魔王說偈答言

我從昔來於彼人

曾作無量惡畱難

汝亦應見菩提樹

瞿曇勝我及軍衆

如是我等數惱亂

瞿曇常勝於我等

不見天龍阿修羅

能動彼人一毛端

爾時復有魔之大臣名珊盧遮那而說偈言

我等可速捨欲界

但當自護已宮殿

瞿曇昔來未至此

今來拒之莫聽前

爾時魔王甚大憂愁默然不言復有大臣名起怖畏而說偈言

唯有巧力可伏寃

當以諂僞詐爲親

我等將衆往詣彼

詭詐而歎彼沙門

復有大臣名毗闍陀行而說偈言

昔此宮殿衆盈滿
沙門侵奪今減少
已歸彼者衆甚多
我等亦可往歸依
爾時魔王聞其所說卽瞋彼臣瞋已默然復有大臣
名曰老智而說偈言

瞿曇力加諸宮殿

出此種種異音聲

我等若不疾詣彼

沙門必速來到此

此處無人能遮護

以力止彼瞿曇仙

我等寧可共一切

速詣歸彼大沙門

爾時於彼諸宮殿中所居大衆男女婦女眷屬大小
悉作一朋復作是言大王今可將諸眷屬速詣彼所

我等今當守護此諸城邑宮殿爾時魔王卽作是言
如是如是我與他化自在天王及諸軍衆眷屬大小
往詣彼所并與化樂天兜率陀天須夜摩天釋提桓
因及其軍衆共詣彼所復與毗沙門天王并諸軍衆
毗樓勒叉天王并鳩槃荼軍衆提頭賴吒天王并乾
闥婆緊那羅軍衆毗樓博叉天王及諸龍衆往詣彼
所作是語時復有魔王輔佐大臣名珊遮羅拏白言
大王今者所有諸天宮殿皆悉空寂欲界諸天及諸
天女一切眷屬悉在瞿曇大沙門所聽法而住如是
緊那羅龍鬼夜叉迦樓羅鳩槃荼悉在彼處種種供

養沙門瞿曇聽受其法爾時魔王自觀察已見諸欲界一切宮殿皆悉空寂欲界之中所有諸天人非人等皆悉集在於瞿曇所而坐聽法唯有阿修羅未到於彼而作是言我今當與諸阿修羅俱詣彼所今其會衆皆悉惑亂不得正信勿使瞿曇教彼大衆諸法如幻不去不來不散不生不滅令我欲界皆悉空寂復作是言我今當共諸阿修羅并及軍衆疾詣彼所遮諸衆生不令速得越度苦海到於彼岸以沙門力速背死法令我境界勢力減少我今速往遮護彼諸人非人等時魔波旬卽以魔之神通境界念四

阿修羅王及其軍衆一切眷屬速來集在須彌山頂然後相將共下詣彼瞿曇沙門所詐設美言謙下讚歎示作歸依求覓因緣當以方便令諸大衆悉生怖畏斷其正信又不令彼於瞿曇所生其尊敬以是令彼沙門瞿曇厭患於世速入涅槃如是魔王數數希望阿修羅衆然諸阿修羅爲佛神力之所加故茫然不知魔之希望其魔卽時惡意於佛及一切阿修羅便作是言觀瞿曇一人於我境界已得解脫不可追廻我於欲界悉得自在凡賤畜生阿修羅不受我教我當爲其作大衰惱令彼速捨所治宮殿然後我

當以神通力將諸眷屬往見瞿曇又復與諸大臣勇
將左右諸軍男女婦女營從圍遶以第一最勝五音
作樂調戲歌舞一切衣服莊嚴之具衆寶香花幢旛
寶蓋音聲和合令速嚴辦往見瞿曇我今亦將夫人
采女乃以男女大衆圍遶以第一最勝魔之境界神
通遊戲五音和合往見瞿曇何以故唯除瞿曇諸餘
大衆天龍乾闥婆人及阿修羅等世間大衆悉令迷
惑當以堅牢欲網而羅網之於生死大海不令速度
是故詣彼餘者畱住守此宮殿時魔波旬卽將九百
六十萬頻婆羅眷屬男女婦女童男童女大臣左右
以魔境界神通加持作第一最勝五音妓樂歌舞調
戲一切所有令人多喜生染著者悉具備之時魔波
旬往彼諸宮告言悉出往詣彼所而復合掌說偈頌
曰

唯佛盡除諸煩惱

唯佛能化諸世間

唯佛能然正法燈

三界中最我歸依

爾時魔王旣作如是魔之神通境界力已從彼宮出
以手散花所散之花於四天下悉作花蓋在空而住
於一切處悉雨種種寶種種花如雲而下當於爾時
世尊仍說住阿蘭若第一義諦佛告大衆汝等一切

守攝諸根繫心專念莫令馳散此魔波旬多將諸衆
歌舞調戲五音作樂衆妓和合又與婦女眷屬大小
圍遶而來爾時魔王與諸眷屬尋卽來到佉羅帝山
牟尼諸仙所依住處到佛所已卽於佛上虛空之中
化七寶蓋縱廣七由旬而覆佛頂復以無價眞珠瓔
珞嚴置佛上復以種種衆寶花香塗香末香天鬘幢
旛寶蓋金縷眞珠瓔珞及五音妓樂供養世尊右遶
三匝而說偈言

我今歸依佛世尊
從是終不起惡心
瞿曇心定容恕我
我當守護佛正法

於世更無如世尊	憐愍利益衆生者
自得解脫令他得	是故我歸最勝尊
唯佛慈愍一切衆	已越生死煩惱山
常慈樂度諸衆生	今速歸依汝世尊
能了有爲及無爲	離二如蓮不著水
積德梵行所依身	是故我今歸依佛
世無寂定無病法	清淨常勝伏煩惱
唯有正法及涅槃	是故歸依無等法
於世更無如僧衆	和合解脫八丈夫
能離一切煩惱縛	是故歸依大德僧

閑居靜默常一食

第一義心恒相應

慈悲愍念諸衆生

我亦歸依於彼等

於三寶種作熾然

護養所有佛聲聞

我勸一切諸衆生

各衣上饌而供養

爾時會中諸來大衆若天若人乾闥婆等同聲讚言

善哉善哉爾時世尊告慧命憍陳如而說偈言

我已告汝聲聞衆

所有相應求解脫

常樂所依四聖種

以彼得滿菩提道

如樹果繁速自害

竹蘆結實亦如是

如騾懷妊自喪身

無智求利亦復然

亦如盛夏惡雷雨

傷害一切諸苗稼

如是貪求利養者

必當退失勝菩提

又如諸樹花開敷

而復爲火所焚燒

如是貪求利養者

亦當退失菩提道

若有比丘得供養

樂求利養堅著者

於世更無如此惡

故令不得解脫道

如是貪求利養者

既得道已還復失

爾時魔王聞說偈已卽自念言沙門瞿曇知我虛僞

詐現歸依羞愧默然退坐一面聽法而住魔諸婦女

諸根形貌容狀光色皆悉枯悴變成惡色背偻跛蹙

醜陋弊惡所有男夫都不復能歌舞調戲五音作樂
皆悉閉塞不能出聲却坐一面聽法而住

諸阿修羅詣佛所品第三

爾時月藏菩薩摩訶薩為欲攝化諸衆生故說月幢
月呪句之時於彼四大阿修羅王所治之處一切所
有草木花果衆寶瓔珞莊嚴之事迭相振觸出五音
聲所有鼓貝箜篌箏笛具足作樂彼等音中亦復演
出如是偈句

唯佛化導以安隱

并衆住在佉羅山

於臭煩惱拔衆生

為其說法永斷除

凡夫悉墮生死海

煩惱駛河起波浪

三有更無哀愍者

如牟尼尊慈善心

多衆聚集一方所

天人鳩槃龍夜叉

悉依佉羅帝山住

於諸苦畏求解脫

我等俱時速詣彼

為欲聽聞正法故

魔王不久或來此

而為我等作留難

一心聽受勝妙法

於彼淨心得大福

以福長壽降諸怨

於世常受威德樂

若以此福求解脫

斷諸煩惱得羅漢

及斷諸緣作辟支

亦能成佛具諸樂

如是當得無有疑

是故速捨諸緣縛

一切當起清淨心

速到佛所修供養

從此賢劫初以來

未有如是大衆集

於後久遠彌勒興

我等不得許時壽

爾時於彼四阿修羅城邑宮殿有如是事以菩薩力莊嚴加持故聞是句義皆生信心各各於其城邑宮殿雲集一處共相謂言今當於此欲有何事所以者何我等昔來未曾見者今得見之昔未聞者今得聞之無人知者時魔波旬從已宮下欲禮佛故而往散花所散之花於四天下皆作花雨當雨之時於四阿

修羅城邑宮殿遍一切處皆悉變作最極臭穢及惡煙塵灰土蓬焯處處盈滿蚤蚋蛇蠍諸惡毒蠅亦復悉滿憂愁惱亂不可愛樂當於爾時諸阿修羅城邑宮殿皆悉黑闇一切阿修羅男夫婦女童男童女悉懷最極憂愁惱亂不樂住彼各於巷陌送相雲集至已王所在前住立阿修羅王見諸衰害極增憂愁毗摩質多羅阿修羅王與諸眷屬及所治處一切阿修羅男夫婦女童男童女波羅陀阿修羅王跋持毗盧遮那阿修羅王與諸眷屬及所治處男夫婦女童男童女向羅睺羅阿修羅王所治城邑聚落宮殿見彼

如是諸惡惱亂畜畜蛇蠍毒蠅等已三阿修羅王俱
至羅睺羅阿修羅王所於前住立毗摩質多阿修羅
王請問羅睺羅阿修羅王而說偈言

一切修羅諸宮殿 猶如地獄等無異
熱風暴起來至此 一切狀似火燒焚
所有樹林諸果實 悉皆墮落在於地
諸有蓮華及浴池 草苗衆花悉枯竭
煙塵蓬煇於我等 阿修羅城諸宮殿
及有畜畜蚤惡蠅 無量諸惡毒蟲等
今聞如是衆惡聲 衆生多惱不喜樂

諸阿修羅受此苦 悉爲饑渴所逼惱
苦逼無所可歸依 一切驚怖心焦枯
生死畏等誰威力 而不利益我天龍
以何方便令休息 如是種種怖畏事
非是惡龍來至此 降伏我等阿修羅
爾時羅睺羅阿修羅王說偈答言

阿修羅輩汝諦聽 我等昔日具安樂
五欲所須皆稱意 神通勇健有大力
所持弓刀及箭稍 胷索矛矜劔輪等
一切今當悉退落 城邑巷陌盡茫然

男夫婦女先克健 顏色端正有勢力
悉與諸天共齊等 於今時中定當盡
命盡衆生白法盡 羞恥慚愧解心盡
及聰明人所知盡 巧行與善聖智盡
苗稼及諸花藥盡 果味等盡諸戒盡
所欲稱意音樂盡 衆寶衣服飲食盡
喜樂事盡人天盡 夜叉乾闥修羅盡
婆羅門種刹利盡 并諸毗舍首陀盡
唯共諸惡衆生等 非聖諂曲殺盜姪
妄語兩舌綺惡口 貪恚胆佞癡邪見

儉短增長及饑渴 愛離怨會與捕獵
見他得利生嫉忌 割截斬斫諸破壞
毒害刀稍劔輪增 面目流淚憂悲苦
蚩蚩惡風及烟塵 斯等竝來爲觸惱
地獄畜生與餓鬼 是等境界大苦海
此非善行相應時 念念退失於正見
白業之人惡事增 如是衆惡皆興盛
是阿修羅盡時至 唯無等乘能遮止
爾時波羅陀阿修羅王白羅睺羅阿修羅王說偈問

言

經

大方廣華嚴經卷之三

三

卷之三

唯王為諸眾生故

常勤精進修諸法

具大福德神通力

及以智慧莊嚴身

此是何力誰所作

欲滅我等阿修羅

誰能救護於我等

當禮敬彼而歸依

爾時羅睺羅阿修羅王說偈答言

此非釋梵天王力

亦非自在那羅延

又非夜叉及龍神

唯除魔王欲自在

昔惱諸龍亦如是

大仙瞿曇為斷除

我等禮彼瞿曇仙

能施我等安樂故

爾時跋持毗盧遮那阿修羅王以偈問言

為是天人龍夜叉

能施一切安樂者

彼何神通精進力

為當方便造幻惑

於何法中得自在

阿誰能受彼教勅

為於魔力得解脫

而得何力使其然

爾時羅睺羅阿修羅王以偈答言

昔見端正大沙門

端坐菩提樹陰影

魔將軍眾而詣彼

以慈悲力速降伏

於彼得成勝菩提

超過一切諸天眾

具大慈悲入涅槃

故能枯竭眾苦海

此諸仙中最勝幢

具足十力眾生樂

釋梵自在修羅仙

欲自在魔那羅延

悉禮於彼作歸處

是人能示衆解脫

於諸一切三界中

超勝所有諸天衆

調伏寂靜降諸根

樂寂七聖財莊嚴

安住涅槃到彼岸

悉能枯竭煩惱海

是故我等一切衆

悉歸能滅諸苦者

皆持種種妙香華

各各合掌而求請

爾時羅睺羅毗摩質多羅波羅陀跋持毗盧遮那四

阿修羅王及男夫婦女童男童女所有一切阿修羅

衆皆悉雲集有以燒香供養禮佛而求請者有持種

種雜色妙華有持種種摩尼寶珠有持種種幢幡寶

蓋金縷真珠瓔珞衣服以用奉佛而求請者有持種

種琴瑟箏篴簫笛鼓吹五音作樂供養禮拜求請佛

者羅睺羅阿修羅王以已神通境界之力大身遊戲

兩手執持帝釋毗楞伽摩尼寶鬘頭面禮拜遙奉世

尊說偈讚曰

佛爲衆生樂

久修諸苦行

憐愍一切衆

願亦愍我等

忍辱如大地

悲愍諸衆生

休息諸濁惡

愍覆於我等

佛度諸畏訖

得於無上智

等心於衆生

願愍阿修羅

佛以八聖船 度脫苦眾生 涅槃味充飽

慈念阿修羅 佛於諸眾生 不恥惡種姓

一切如赤子 是故歸依佛

爾時毗摩質多羅阿修羅王以兩手捧持一切諸天

登祚所著摩尼寶鬘頭面作禮以偈讚曰

勝過天龍眾 修羅鳩槃荼 盡除諸煩惱

心意所作惡 降伏業苦道 而到於彼岸

遠離於有想 及無想眾生 悲念眾生故

不入於涅槃 為諸眾生故 能忍一切苦

視於諸眾生 如母念一子 願愍於此等

苦處灑悲水 休息苦惱觸 煩惱水所溺

起發堅勇者 願救眾生苦 念今苦苦至

為魔力所壞 苦觸阿修羅 願灑大悲水

眾生若於佛 起於瞋惡心 而不能動佛

身心少分者 若彼所有樂 境界身心事

佛當等慈愍 於此更無異 唯佛於天人

能施一切樂 我等為魔惱 心孤無所依

無有餘眾生 能滅於魔業 唯佛速除遣

盡壞無有餘 諸天龍證知 夜叉阿修羅

如佛眾生最 能救一切苦 魔欲速滅我

修羅諸宮殿 願速放戒光 施我滿足樂

爾時波羅陀阿修羅王兩手捧持梵天光幢摩尼寶珠和合天鬘頭面作禮說偈讚曰

流轉獄所縛 離諸一切樂 極惡大巨海

沒溺無所依 唯佛精勤行 於三阿僧祇

自度到彼岸 悉竭煩惱海 為諸眾生故

六年行苦行 而得無上智 滅除彼煩惱

我等為魔嬖 無力受諸苦 願除魔所加

洗浴我等宮 此等僧祇眾 為諸苦所惱

願救此諸苦 當往見世尊

爾時跋持毗盧遮那阿修羅王兩手捧持梵天艷光摩尼寶鬘頭面作禮以偈讚曰

今禮牟尼尊 於法自在者 超過釋梵王

降魔及軍眾 超過日月光 及與四天王

慈悲明日月 普照諸眾生 五日並出時

海水悉枯竭 若供佛功德 無能枯竭者

超度於三界 而入無畏城 大悲覆眾生

諸苦悉除滅 等心諸眾生 如母視一子

我等憂翳障 慈風願吹散 更無餘歸依

可救我等苦 如佛功德滿 莫捨修羅宮

爾時世尊以佛耳聞以佛眼見諸阿修羅城邑宮殿
魔力所加一切諸難皆悉周遍無有遺餘俱受熱惱
願樂求我蔭覆救護爲歸爲趣我當救護諸阿修羅
今正是時于時世尊以大悲威勢現一切樂卽入悲
風光明三昧三昧力故令四阿修羅宮殿所有魔之
神力所加苦事一念之頃皆悉休息還復如故亦如
三十三天宮殿於中卽現第一妙樂可樂之事彼諸
阿修羅見已踊躍心生歡喜口眼皆悅熙怡微笑皆
作是言南無佛陀南無佛陀作是語已卽以諸天勝
妙寶鬘向佛方所遙擲奉獻其羅睺羅阿修羅王所
擲寶鬘卽到佛所於佛頂上空空中而住毗摩質多羅
阿修羅王所擲寶鬘亦到佛所於虛空中住右肩上
波羅陀阿修羅王所擲寶鬘亦到佛所於虛空中住
左肩上跋持毗盧遮那阿修羅王所擲寶鬘亦到佛
所住於佛前放光而照其餘所有諸阿修羅復持種
種衆寶香花幢旛寶蓋及以金縷寶珠天鬘真珠瓔
珞種種衣服塗香末香彼等一切悉向世尊遙擲奉
獻而以供養是時於此佉羅帝山牟尼諸仙所依住
處雨種種花乃至末香如降暴雨爾時會中有菩薩
摩訶薩名求斷疑從座而起偏袒右肩合掌禮佛以

經

大方廣華嚴經卷之二

廿七

威二

經

大方廣華嚴經卷之二

文

威二

偈問曰

大仙世尊無量智

於先已雨如是雨

現諸神通變化瑞

月藏菩薩來到此

今復雨於種種寶

誰當復來到於此

爲是大德諸菩薩

爲是他方諸佛使

爾時佛告斷疑菩薩摩訶薩言善男子此是魔王
波旬於四阿修羅城邑宮殿化作陰闇灰塵烟霧畜
虫毒蠅及以種種毒蛇蜂蠍於彼一切樹林草木花
果泉池皆悉枯涸一切阿修羅苦困欲死彼等向我
一心歸依合掌作禮以種種花乃至末香於彼阿修

羅所住城邑向我遙擲而作供養羅睺羅阿修羅王
所擲寶鬘今我頂上者是也毗摩質多羅阿修羅王
所擲寶鬘在我右肩者是也波羅陀阿修羅王所擲
寶鬘在我左肩者是也跋持毗盧遮那阿修羅王所
擲寶鬘今住我前者是也爾時魔王波旬從座而起
向佛合掌恭敬禮拜而作是言此諸阿修羅蒙佛恩
福我今亦令諸阿修羅還得具足饒益安樂佛告波
旬汝今不須作如是言我已令其充足安樂我諸阿
修羅城邑宮殿轉勝微妙樂具悉有還復如本何以
故彼等四大阿修羅王是我親舊如是其餘所有一

經
切阿修羅等於我得信敬仰尊重心生希有今當不久來至於此爲聽法故魔王波旬復生惡心而作是念我是一切欲界之中最勝自在於諸衆生能作苦樂沙門是人何能狡猾幻惑異端妖邪多語敢共我競而欲與我较量比並釋梵四王摩醯首羅那羅延天轉輪聖王一切衆生無能與我较量比並作相違者今此瞿曇作幻誑惑一切衆生遍四天下地及虛空一切盈滿皆悉欲見瞿曇故來今此下賤畜生之類諸阿修羅亦復蒙攝我今當作魔之境界神通勢力遊戲所加更作幻惑惱亂於彼沙門瞿曇及以降伏諸來會衆時魔波旬觀其眷屬而說偈言

諸魔各作念 我當降伏怨 及惱此會衆
并禁阿修羅

爾時世尊而說偈言

汝應見我力 昔於菩提樹 天神爲證明
我修真正法 隨汝所有力 恣汝當現之
若能惱我者 我當作歸依

爾時魔王波旬復增第一極重瞋恨以一切魔力境界神通遊戲所加念於四方最熱之風令其一切諸來大衆熱風觸惱而作降伏于時世尊卽入摧伏魔

力三昧其三昧力卽於四方復起第一妙香涼風觸
其身分皆受快樂魔王波旬知是事已復於佛前化
大火坑世尊卽於彼處化作清涼大池水涌上出魔
王見已復於空中降雨大石佛卽變其所雨之石悉
令化作種種天花而雨其處魔王波旬及與眷屬復
以兩手捉住羅帝山而欲速疾震動三千大千世界
佛復以此三千地界加作金剛尚不能動乃至一塵
況能多也魔王復以瞋怒之力向阿修羅所住之方
放口噓氣成黑氣雲令其城邑宮殿陰闇使諸阿修
羅重復迷惑不能去來爾時世尊卽復變其所吹氣

雲令作種種天花雲爾時於彼四阿修羅城邑宮
殿復雨種種天花之雨其花雨中演出百千微妙法
門所謂佛聲法聲僧聲檀那波羅蜜聲乃至般若波
羅蜜聲三善行聲三歸依聲三律儀聲三不護聲三
依止聲三種菩提聲三乘聲三修聲三種善根聲越
度三界聲三受聲三解脫聲三示現聲四念處聲四
正勤聲四如意足聲四不壞信聲四禪聲四梵住聲
四攝聲四無礙智聲四無色定三摩跋提聲四聖諦
聲五根聲五力聲五支三昧聲五解脫入聲顯示六
根聲六和敬聲六念聲六通聲七聖財聲七識住聲

七覺分聲八聖道聲九次第定聲十聖處聲佛十力
聲大慈聲大悲聲因緣生起聲心不可壞聲捨一切
惡見聲不忘菩提心聲不退轉聲忍聲三昧聲陀羅
尼聲授記登祚聲無生忍聲苦行聲十地聲十八不
共佛法聲到菩提聲轉法輪聲不可壞佛聲捨聲厭
聲解脫定聲滅聲成就衆生聲攝受正法聲辯才聲
無常聲苦聲無我聲空聲無所作聲寂靜聲無生聲
如聲實際聲入法界聲無衆生無命無養育無受者
如如不生不滅不常不斷不去不來不住不行聲大
神通變化聲加護三寶種聲乃至大般涅槃聲地獄
畜生餓鬼人天苦五陰重擔聲數數流轉生死與愛
別離聲一切有爲流轉之獄如幻芭蕉水月響聲信
念精進忍及智慧十善業道護持聲出彼流轉獄聲
於彼花雨出是無量百千種聲彼諸音聲能令無量
阿僧祇等阿修羅於三寶中深得敬信尊重歸依生
希有心渴仰欲見釋迦牟尼及欲聽法供奉衆僧極
甚驚怖流轉生死與愛別離怖望涅槃彼諸一切阿
修羅等俱發聲言南無釋迦牟尼如來南無釋迦牟
尼如來我等今往見於釋迦牟尼如來禮拜供養故
聽法故及供奉衆僧故爲看大集故爲求無上菩提

乘故爲退落魔幢故爲建立法幢故爲三寶種不斷
絕故爲聽第一義聖諦法門故爲休息煩惱道苦道
故爲斷截魔縛故爲枯竭愛河故爲滿法海故爲入
智海故爲成熟衆生海故爲供養諸佛海故是故我
等及諸眷屬往詣佛所不爲惡魔於我等中更得自
在我等從今不復重遭如是之苦爾時牟真隣陀阿
修羅王復作是言我今亦與婦妾宮人男女大小諸
阿修羅婦女眷屬八萬四千一切皆悉著青衣服青
色莊嚴青繖青蓋青幢青旛青車青花青色摩尼琴
瑟箏篥青寶青鼓我今將諸五音作樂歌舞調戲第

一莊嚴及將眷屬而往見佛恭敬禮拜聽受妙法供
奉衆僧故往詣佛所爾時須質多羅阿修羅天復作
是言我今亦與婦妾宮人男女眷屬九十九百千阿
修羅婦女一切皆著黃衣莊嚴乃至供奉衆僧故往
詣佛所爾時睺婆羅阿修羅王復作是言我今亦與
婦妾宮人男女眷屬百千億阿修羅婦女一切皆悉
著紅色衣瓔珞莊嚴乃至供奉衆僧往詣佛所爾時
跋持毗盧遮那阿修羅王復作是言我今亦與婦妾
宮人男女眷屬九十九頻婆羅阿修羅婦女一切悉
著朱色衣服瓔珞莊嚴乃至往詣佛所爾時毗摩質

多羅阿修羅王復作是言我今亦與婦妾宮人男女
眷屬九十九惡初失尼百千阿修羅婦女一切悉著
玻瓈色衣瓔珞莊嚴乃至往詣佛所爾時羅睺羅阿
修羅王復作是言我今亦與夫人采女男女眷屬及
土田主附庸王并及長者臣將左右城邑聚落所有
人衆如恒河沙等阿修羅婦女一切悉著碼碯色衣
瓔珞莊嚴復持碼碯色衣及與幢旛寶蓋金縷真珠
瓔珞摩尼寶珠香花塗香及所乘車皆悉同是碼碯
之色并以鼓角琴瑟箜篌簫笛妓樂如是等事皆碼
碯色相與作樂歌舞戲笑最勝莊嚴在於虛空爲欲
見佛禮拜供養及爲聽法供奉衆僧故往詣佛所如
前所說皆悉嚴備彼諸色相第一微妙希有未有昔
來未聞如是等大莊嚴事從彼阿修羅所居處出住
在空中爾時毗摩質多羅阿修羅王及與眷屬五音
作樂歌舞戲笑詣羅睺羅阿修羅王於前而引爾時
波羅陀阿修羅王及與眷屬皆大嚴持到羅睺羅阿
修羅王右相而引爾時跋持毗盧遮那阿修羅王并
與眷屬亦復如是具大莊嚴到羅睺羅阿修羅王左
相而引爾時跋娑羅阿修羅王及與眷屬亦悉嚴持
詣羅睺羅阿修羅王於後而引爾時牟尼隣陀阿修

羅王及與眷屬亦大嚴駕到羅睺羅阿修羅王在上
而引爾時須質多羅阿修羅王及與眷屬如是莊嚴
亦到羅睺羅阿修羅王在下而引爾時於中羅睺羅
阿修羅王及與眷屬如是色相以大莊嚴五音妓樂
一時俱作歌舞戲笑音聲和合而詣佛所復以兩手
持種種寶花天髮塗香向佛方所遙散奉獻到佉羅
帝山上變作大雲空中而住其佉羅帝山牟尼諸仙
所依住處兩種種種花種種天髮種種塗香爾
時會中有諸衆生作如是念欲有何事是何等力先
作此瑞爾時世尊告慧命耶舍言汝等比丘當自正
念繫心而住勿得散亂世尊復告慧命耶舍汝等比
丘當以精勤繫念而住勿得散亂若能精勤繫念不
散則能休息煩惱之道及除苦道能除第一義諦能
滿六波羅蜜不久得成阿耨多羅三藐三菩提此是
諸阿修羅及與一切眷屬妓女而今欲來并作五音
妓樂和合而作莊嚴爲禮拜我供養聽法是故汝等
勿得散亂繫念而住爾時一切阿修羅及與眷屬尋
卽來到佉羅帝山到已卽時右遶其山三匝訖已將
諸眷屬詣世尊所爾時羅睺羅阿修羅王向世尊頭
面作禮右遶三匝於前住立持梵天髻上光明艷色

摩尼寶珠置於佛前復用種種寶花末香幢幡寶蓋
及以金縷真珠瓔珞復以種種歌舞作樂而用供養
合掌向佛說偈讚曰

心調士中最	能施一切樂	法燈常法施
增長法智慧	世尊然法炬	天人皆悉知
了達佈望法	安住涅槃道	唯佛蔭諸眾
如蓋覆一切	摧伏諸陰魔	死魔煩惱魔
降魔及軍眾	并及惡心意	稽首於世尊
勇健怒諸有	是魔極惡心	常行諸惡事
此是彼戲笑	欲得眾生苦	此諸修羅宮

苦雲悉彌覆	佛卽起悲心	觸我諸修羅
佛爲眾生故	修諸苦行訖	多劫修檀戒
行忍及智慧	世尊更不作	諸餘惡行事
佛以如是事	足令我得樂	唯佛精進士
三界無等雙	離諸煩惱縛	解脫於三有
佛仍於眾生	慈悲而常轉	禮佛不動山
慈心正安住		

爾時毗摩質多阿修羅王及與眷屬頭面接足禮拜
世尊右遶三帛佛前住立卽以千斤閻浮檀金置於
佛前復以日愛寶摩尼珠置在佛上如是種種寶種

種香花乃至種種歌舞伎樂而作供養合掌恭敬說
偈讚曰

釋梵大自在	輪王那羅延	護世及波旬
悉無如是力	天龍夜叉等	人及阿修羅
亦無如世尊	慈悲大勢力	唯佛眾生最
如地不顛喜	能忍一切惡	并作惡業者
等視諸眾生	如母愛其子	心平於一切
是故禮佛足	願護此一法	勿使魔更來
不令彼得勝	作此惡惱害	一切惡瞋怒
及以最極惡	實語願說呪	降伏諸魔軍

如人身無病	不求諸醫師	如是阿修羅
無事不想佛	我今甚歡喜	來詣於佛所
願說清淨法	令到菩提道	顯示諸賢聖
寂定如虛空	遠離於諸惡	及離我我所
速知於實際	能除諸煩惱	速斷一切縛
得知最上道		

爾時波羅陀阿修羅王及與眷屬頂禮佛足右遶三
帀持衆雜色種種寶樹狀如波吒羅七寶之樹置於
佛後種種寶葉花果金縷真珠瓔珞天生寶鬘天瓔
衣服指印環玕寶蓋幢幡手瓔珞脚瓔珞臂瓔珞寶

莊嚴具於佛頭上空中垂下乃至種種歌舞作樂而
供養佛一心合掌說偈讚曰

衆生常爲彼 煩惱火所燒 求樂恒不得

不遇施樂者 一切住惡道 唯佛衆生藥

安住解脫道 能救一切苦 唯佛商人主

三有中更無 愍進智慧水 衆德滿如海

爲盲失道者 安住於正路 導引諸衆生

住勝涅槃道 凡夫饑無厭 唯佛能充飽

常爲煩惱溺 唯佛能救拔 遭溺之病苦

苦遍失其念 如此苦苦者 導師爲親救

惡心衆生等 龍鬼諸羅刹 見佛得正念

安住大悲心 唯佛於三界 能作救護者

我等已孤獨 悉爲衆苦溺 我等皆一心

一切樂法住 願說最上義 令我得菩提

以得於佛眼 最上諸佛智 速伏諸魔怨

願降正法雨

爾時跋持毗盧遮那阿修羅王將諸眷屬頂禮佛足
右遶三匝於佛左右積閻浮檀金復以種種寶種種
花種種末香寶蓋幢幡及以金縷真珠瓔珞歌舞作
樂合掌供養說偈讚曰

福田福德水	福種福德芽	福樹福德枝
福條福德葉	福花福味果	最上福味漿
福色福陰影	福德子成就	佛福善堅固
福勇能伏他	福色勇健士	福德不動山
福花覆善土	福藥所依身	福山最上頂
放福智慧水	福德海甚深	福德衆生依
妙福衆寶研	福味如巨海	福器盛甘露
福願皆成滿	福實恒將向	無漏寶國土
我等衆福盡	是故歸依佛	福德賢寶瓶
願愍施我等		

爾時復有阿修羅仙名一切菩提鬘具有大福大威
 德大智慧大苦行以菩提心而作莊嚴得五神通離
 諸塵垢安住成就一切衆生常化一切阿修羅等堪
 受彼供是諸阿修羅無上導師與九萬五千具足五
 通阿修羅仙前後圍遶來詣佛所頂禮佛足以真金
 瓶盛八功德水置於佛前并獻寶杖復與九萬五千
 眷屬各各執持異種寶蓋以奉世尊右遶三市合掌
 向佛說偈讚曰

忍辱如大地	忍水常盈滿	安住於淨忍
寧心無所失	煩惱渴愛盡	安處於信財

經
 天
 卷
 二

大方等集月藏經卷第二

佛住慈悲心 置衆菩提道 說法猶如水

若聞如是法 愛樂菩提心 能成第一義

大悲願調伏 此諸下劣行 願受我修羅

所獻衆寶物 三界所有供 棄捨不求染

唯佛無煩惱 堪受世供養 佛以大菩提

嚴三有衆生 願說第一義 爲得菩提故

我於拘留孫 曾聞第一義 拘那含牟尼

迦葉佛亦然 我以自願力 應現阿修羅

爲化修羅故 修行菩提道 聞法獲德藏

復能轉示他 降魔惡徒黨 熾然正法明

於此濁惡世 難有功德人 現佛境界事

大方等大集月藏經卷第二

音釋

鎧 鎧古洽切與甲同 矛 稍矛莫浮切勾兵也 電

蒲角切 背 僂背補妹切僂力主切 跛 蹇足偏廢也

不能行也 馳疾也 胆 佞胆正作狙七慮切詐

媯而沼切 枯 涸枯苦胡切乾也 洞乃定切諂佞也

賣式羊切行 式賣日商

90 1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 22

經
卷二
三

金沙居士王誦吾捐資刻此
大方等大集月藏經卷第二 計字一萬零二
十二箇 該銀六兩零一分三厘 伏願生
生契悟妙心世世常聞正法
丙戌年五月 日識

長壽寺師心

依此觀惡母 鑽穴如樹人 與謝異界等

大方等大集月藏經卷第三

高齊天竺三藏那連提耶舍譯

本事品第四

爾時彌勒菩薩摩訶薩卽從座起偏袒右肩整理衣
服合掌向佛而作是言世尊既是釋迦貴種刹利大
姓迦毗羅城淨飯王子此四阿修羅畜生種類極成
卑下世尊何故言與我親爾時佛告彌勒菩薩摩訶
薩言於過去世第三十一劫有佛出興號毗舍浮如
來應正遍知明行足善逝世間解無上士調御丈夫
天人師佛世尊彼佛常爲四衆說法爾時有一大婆

經
大方等大集月藏經卷三
三

羅門名弗沙耶若已於過去無量佛所種諸善根於
阿耨多羅三藐三菩提而不退轉深信具足歸依三
寶受持五戒離諸放逸時弗沙耶若有弟八人一名
弗沙金剛二名弗沙那毗三名弗沙闍利四名弗沙
跋摩五名弗沙車帝六名弗沙樹七名弗沙毗離八
名弗沙那提時弗沙耶若婆羅門勸諸弟言汝等賢
首今可歸依佛法僧寶受持五戒離諸放逸發阿耨
多羅三藐三菩提心時彼諸弟皆悉不肖歸依三寶
乃至不肖發菩提心時弗沙耶若數勸諸弟經於多
年復問諸弟汝等何故皆悉不肖歸依三寶乃至不
肖發菩提心竟有何意何所願求時彼八弟卽作是
言兄能千年修二威儀唯行唯住不坐不臥經七日
夜限食一搏修此難行足滿千年然後我當歸依三
寶受持五戒離諸放逸發於無上菩提之心彌勒時
弗沙耶若聞是語已一心喜悅卽爲八弟而立誓言
汝等若能歸依三寶乃至能發阿耨多羅三藐三菩
提心不退轉者我今必當千年之中不坐不臥七日
七夜限食一搏我立誓已於千年中若晝若夜乃至
一剎那頃念於坐臥乃至於七日夜過食一搏永當
使我違三世佛違六波羅蜜違十善業道不成阿耨

多羅三藐三菩提爾時空中有百千億那由他無量
諸天讚言大士善哉善哉堅固勇猛大力決定汝於
來世盲冥衆中當得成佛多陀阿伽度阿羅訶三藐
三佛陀聲震於世時毗舍浮佛以弗沙耶若頭陀功
德故讚言善哉善哉大婆羅門汝今以此苦行威儀
行檀波羅蜜乃至般若波羅蜜故於未來世過第三
十一大劫已有一大劫名賢賢劫中人壽命百歲於
彼成佛號釋迦牟尼如來應正遍知聲震於世汝當
爾時與此八弟授阿耨多羅三藐三菩提記彌勒彼
弗沙耶若婆羅門足滿千年不坐不臥經七日夜限

食一搏滿千年已令彼八弟安住三歸受持五戒及
發無上菩提之心善男子是弗沙耶若化其八弟及
餘無量百千萬億那由他等諸婆羅門長者居士男
子女人童男童女皆成熟已卽於毗舍浮如來法中
出家學道爾時所有解說經論及諸外典誦持不忘
爲人解說然後至閑林中與第一義諦禪波羅蜜相
應而住經五萬年於彼時中成熟無量百千萬億那
由他阿僧祇天龍夜叉阿修羅迦樓羅緊那羅摩睺
羅伽畜生餓鬼毗舍遮人非人等向於阿耨多羅三
藐三菩提令不退轉彌勒彼弗沙耶若婆羅門者豈

經

大方廣阿耨多羅三藐三菩提經卷第三

三

三

經

大方廣阿耨多羅三藐三菩提經卷第三

三

三

異人乎莫作異觀我身是也我於爾時爲欲成熟彼
八弟故於千年中不坐不臥但行但立經七日夜限
食一搏我爲成熟彼諸弟故乃至於閑林中住第一
義諦經五萬年成熟無量百千萬億那由他阿僧祇
天龍夜叉阿修羅迦樓羅緊那羅摩睺羅伽畜生餓
鬼毗舍遮人非人等向阿耨多羅三藐三菩提令不
退轉爾時弗沙金剛者今羅睺羅阿修羅王是弗沙
那毗者今毗摩質多羅阿修羅王是弗沙闍利者今
波羅陀阿修羅王是弗沙跋摩者今婆稚毗盧遮那
阿修羅王是弗沙車帝者今魔王波旬是弗沙樹者

今汝彌勒是以是因緣得無礙智一生補處安住大
乘弗沙毗離者今毗摩羅詰是也弗沙難提者今提
婆達多是也當如是觀我昔爲求阿耨多羅三藐三
菩提故爲欲成熟魔波旬故作如是等無量苦惱毛
豎驚怖難行之事是故今此魔王波旬以福德智慧
二種莊嚴故有如是等神通威力有大功能於欲界
中最勝自在此魔波旬及餘眷屬今於我所起勤害
心於正法幢起摧折心於僧寶所起破壞心於八聖
道起斷除心於正法燈起毀滅心於諸衆生一切善
法起隱沒心致留難心作恐怖心不憐愍心違反之

心令諸衆生退捨善道墮惡趣心於諸龍衆起驚怖
心於阿修羅宮起破壞心於此說法大衆會所欲障
礙故而來至此復起欲壞大衆集心興此惡意顧視
而坐若有衆生爲障礙他故燒亂他故降伏他故欺
凌他故求稱譽故求名聞故依於五欲戲笑樂故求
富貴故修行施戒忍辱精進禪定智慧不爲解脫不
爲信敬不爲離欲寂靜唯爲自身五欲樂故修行施
戒忍辱精進禪定智慧爲如是等諸結所縛雜於愚
癡於欲界中果報成熟爲魔波旬如是苦惱此魔波
旬以本障礙他故燒亂他故降伏他故欺凌他故求

稱譽故求名聞故依於五欲戲笑樂故求富貴故於
毗舍浮如來法中修行施戒忍辱精進禪定智慧以
是因緣今於現在白法盡滅五濁惡世得作魔王於
三寶所不生信敬無尊仰心如是波旬常於衆生而
作諸惡不利益故令苦惱故令墮落故提婆達多亦
復如是此羅睺羅阿修羅王毗摩質多羅阿修羅王
波羅陀阿修羅王婆稚毗盧遮那阿修羅王牟真隣
陀阿修羅王及餘阿修羅等亦於毗舍浮如來法中
僞逸自舉不勤修習復懷疑惑雜諸煩惱貪欲瞋恚
愚癡邪見無明胆佞斷常之心修行施戒忍辱精進

禪定智慧以是因緣今生下類苦惱畜生阿修羅道
爲諸結所縛疑惑愚癡是故彼等尚不能發世俗正
見何況能發無上善根唯有彌勒菩薩摩訶薩毗摩
羅詰及菩提鬘阿修羅仙等於毗舍浮如來法中不
爲障礙他故乃至不求富貴故但樂離欲化衆生故
修六波羅蜜以是因緣此大丈夫彌勒菩薩毗摩羅
詰及菩提鬘阿修羅仙等得無礙智以諸菩薩功德
莊嚴巧成一切衆生智藥是故我今告於汝等若有
欲求無上智者是人應當深信清淨以第一義諦而
求菩提莫以世諦譬如五大河水能滿大海不以小

河如是以依第一義故速能充滿一切智海不以世
諦又如須彌山王依於大地久住不動不以依水如
是以依第一義諦一切善根而得堅固不以世諦又
如一切草木依於大地而得生長不以草葉如是四
念處乃至十八不共法大慈大悲等依第一義諦而
得生長不以世諦又如猛風依於虛空而能吹盪烟
雲塵霧不依於地如是爲求菩提諸善男子善女人
等依第一義諦能吹諸惡見雲煩惱烟霧十惡道塵
不以世諦又如依日大光明故得見高下及諸色像
種種作業不以依彼油燈小光如是以依第一義諦

菩提之心無有迷惑作諸善業不以世諦是故應捨
一切愛取攝受之事住閑林中不作放逸修第一義
不以世諦汝等如是便能速滿六波羅蜜於阿耨多
羅三藐三菩提而成正覺爾時世尊欲重明此義而
說偈言

一生處彌勒 問於尊導師 云何畜生類
言與人爲親 世尊見久遠 告於彌勒言
脩羅等往昔 皆是我兄弟 第三十一劫
毗舍浮佛時 我作婆羅門 聰慧字耶若
六度常相應 菩提不退轉 時我有八弟

邪見婆羅門 勸令信三寶 及發菩提心
彼皆不肯行 愚癡邪見故 旣歷多年已
鈍根作是言 兄能千年中 常離於坐臥
復經七日夜 限食飯一搏 如是千年滿
我當住菩提 我時一心喜 誓住二威儀
旣滿千年已 方得成熟彼 又化多衆生
出家離俗已 復與第一義 相應五萬年
如是第一義 我時本安住 轉化無量衆
堅住無上道 羅睺毗摩質 婆稚波羅陀
波旬毗摩詰 彌勒及提婆 如是八人等

先是我兄弟 爲彼修苦行 成熟於菩提
我爲無上道 行諸苦難事 波旬提婆達
常欲危害我 魔於過去時 所作諸善業
初無有信敬 恒欲惱衆生 但爲富貴欲
求名不尊重 毗舍浮法中 而行於六度
白法盡滅已 惡法增長時 得爲魔波旬
欲界中自在 又於三寶所 不肖生信敬
波旬提婆達 常欲惱衆生 如是修羅王
增上僞逸士 疑惑有欲垢 及諸嫉妬行
今在畜生類 而作修羅王 於諸最勝法

無智不能了 彌勒毗摩詰 道鬘修羅仙
於毗舍得信 修行無上道 彼與六度合
常化諸衆生 是故今殊勝 成熟無礙智
故我今示汝 宜捨諸疑惑 勤修第一義
證菩提不難 如海常充滿 種種衆寶物
如是修真諦 能令智滿足 又如依大地
生長諸苗稼 如是真諦合 能生勝菩提
又如風依空 吹盪諸塵暄 如是修真諦
能滅諸煩惱 又如依日光 明見諸色像
若住第一義 能觀諸佛法 是故若欲求

於世速成佛 宜捨諸見著 安住第一義
往詣閑林中 端坐修禪定 勇決獨無侶
求無上菩提 精勤自調伏 防護於已心
棄捨諸邪見 遠離於斷常 怒心龍夜叉
并及諸鬼神 無量百千億 化之以真諦

第一義諦品第五

爾時月藏菩薩摩訶薩卽從座起偏袒右肩右膝著地合掌向佛而作是言世尊我今欲有所問唯願如來隨時聽許爲我解釋爾時佛告月藏菩薩摩訶薩言善男子如來應正遍知忞汝所問當隨意答令汝

心喜爾時月藏菩薩摩訶薩聞佛語已卽白佛言唯然受教大德婆伽婆云何菩薩摩訶薩住阿蘭若修第一義諦得如月以四無礙成熟衆生能滿六波羅蜜佛言善哉善哉善男子快問是義汝於過去無量佛所植諸善根修諸功德圓滿之行已曾問此甚深之義汝今直欲爲彼未曾修習求阿耨多羅三藐三菩提諸善男子善女人故問如是義善男子諦聽諦聽善思念之吾當爲汝分別解說善男子若有清信善男子善女人求阿耨多羅三藐三菩提者當作是觀三界所有一切衆生皆爲貪欲瞋恚愚癡三毒猛

火焚燒熾然生老病死憂悲苦惱皆亦熾然不得解脫作是觀時菩薩於彼諸衆生所起大悲心復作是念一切衆生莫不厭苦求樂彼等如是爲苦所轉如五節輪復作是念何因緣故此諸衆生衆苦增長無有休息作是念時知諸衆生皆爲愛取因緣所攝故受是苦增長不息是故我當棄捨愛取所攝因緣出向閑林獨而無侶於第一義諦思惟而住如是先自除苦然後乃能除衆生苦如是菩薩以真實心欲令衆生離苦得樂當知此心從大悲起菩薩摩訶薩棄捨一切愛取因緣出向閑林獨而無侶如犀牛牛角於

四聖種喜悅而住不念地不念我地不念地我水火風大亦如是不念色不念我色不念色我受想行識亦如是不念眼不念我眼不念眼我如是不念眼識不念我眼識不念眼識我如是不念眼觸不念我眼觸不念眼觸我如是眼觸因緣生受若苦若樂不苦不樂不念樂不念我樂不念樂我乃至不苦不樂亦如是耳鼻舌身亦如是不念意不念我意不念意我乃至意觸因緣生受若苦若樂不苦不樂不念樂不念我樂不念樂我乃至不念不苦不樂亦如是不念四大不念我四大不念四大我乃至不念三受不念

六想不念三行不念六識不念色聲香味觸亦如是不念虛空處不念識處不念無所有處不念非想非非想處不念見不念聞不念覺不念知不念代謝不念覺觀不念心不念此世間不念彼世間不念過去不念未來不念現在不念斷不念常不念三昧不念禪不念捨不念盡不念用不念生不念滅不念我不念數不念黑不念白不念勝不念劣不念行不念住不念坐不念臥不念闇不念明不念作不念三界不念剎那亦如是

訶訶訶訶訶訶

達囉吽

達囉膩移

沓婆差

沓婆羯勒义移

陀婆木义移

蘇婆賀

善男子是名菩薩摩訶薩住於閑林修第一義說佛說如是阿蘭若第一義諦時有八十億百千頻婆羅諸天及人於第一義諦曾修習者皆得無生法忍復有恒河沙等天人得柔順忍復有過虛空量諸衆生等得不忘菩提心三昧復有八萬四千比丘得無漏心解脫爾時世尊復作是言善男子若有菩薩摩訶薩如上所說棄諸愛取所攝因緣乃至如我所說修第一義諦時云何菩薩摩訶薩得如月以四無礙成熟衆生能滿六波羅蜜善男子如菩薩摩訶薩觀諸

衆生皆爲二毒猛火熾然生老病死憂悲苦惱皆亦熾然不得解脫作是觀時菩薩於彼諸衆生所起大悲心此是菩薩摩訶薩得如月照除衆生無明黑闇如初日月如菩薩摩訶薩爲除衆生諸苦惱故捨諸愛取所攝因緣此是菩薩摩訶薩得如月照除衆生無明黑闇與義無礙相應成熟衆生爲滿六波羅蜜故如二日月如菩薩摩訶薩出向閑林獨而無侶如犀牛角於四聖種喜悅而住此是菩薩摩訶薩得如月照除衆生無明黑闇與法無礙相應成熟衆生爲滿六波羅蜜故如二日月如菩薩摩訶薩修第一義

諦此是菩薩摩訶薩得如月照除衆生無明黑闇與詞無礙相應成熟衆生爲滿六波羅蜜故如四日月如菩薩摩訶薩於三界境界及一切樂皆悉棄捨修第一義諦此是菩薩摩訶薩得如月照除衆生一切渴愛與樂說無礙相應成熟衆生爲滿六波羅蜜故如五日月如菩薩摩訶薩棄捨現在人中樂亦不怖望於五欲樂而修第一義此是菩薩摩訶薩得如月照除衆生一切瞋闇成熟衆生能滿檀波羅蜜是故菩薩摩訶薩於諸衆生如六日月如菩薩摩訶薩於諸境界得奢摩他定此是菩薩摩訶薩得如月成熟

衆生能滿尸羅波羅蜜是故菩薩摩訶薩於諸衆生
如七日月如菩薩摩訶薩三界境界休息相應不分
別瞋不分別慈此是菩薩摩訶薩成熟衆生能滿羸
提波羅蜜是故菩薩摩訶薩於諸衆生如八日月如
菩薩摩訶薩一切三界休息相應不分別極不分別
此是菩薩摩訶薩成熟衆生能滿毗梨耶波羅蜜是
故菩薩摩訶薩於諸衆生如九日月如菩薩摩訶薩
爲悲愍衆生故而修第一義此是菩薩摩訶薩成熟
衆生能滿禪波羅蜜是故菩薩摩訶薩於諸衆生如
十日月如菩薩摩訶薩爲衆生故於諸三界陰界諸

入三受等事不分別極不分別住如實際而修第一
義此是菩薩摩訶薩成熟衆生能滿般若波羅蜜是
故菩薩摩訶薩於諸衆生如十一日月如是善男子
此是菩薩摩訶薩住於閑林修第一義時得如月以
四無礙成熟衆生能滿六波羅蜜復次善男子云何
菩薩摩訶薩修第一義時成熟衆生復得如月善男
子如菩薩摩訶薩住於閑林若行若住若坐若臥捨
離分別一切三界陰界入等住不分別修第一義時
諸地行天龍夜叉羅刹阿修羅鳩槃荼餓鬼毗舍遮
富單那迦吒富單那饑渴寒熱更相怖畏逼迫身心

常懷瞋惡於諸衆生而無慈愍不觀後世畏彼諸天龍乃至迦吒富單那往菩薩所見已大笑而欲奪於菩薩精氣又以惡氣而欲噓之及欲打害散亂其心彼諸鬼神雖起此惡去一由旬不能往到彼菩薩所何能以氣噓之奪其精氣及以打害散亂其心彼諸鬼神心極生恠復示第一最惡形色欲令菩薩畏之心裂然此菩薩若行若住乃至不能動其一毛何況能作諸餘惱亂彼諸天龍乃至迦吒富單那以一切方便不能少分惱亂於彼修第一義諦菩薩摩訶薩彼等便於修第一義諦菩薩摩訶薩所心得敬信尊

重敬仰心生希有以於菩薩生敬信故身心苦盡得樂充滿復等復數詣菩薩所接足禮敬還其本處遊行止住復於衆生更相敬重常生慈心不怖畏心不沮佞心不惱害心無怨讐心不鬪諍心作平等心休息殺生心乃至休息諸邪見心彼等數數向於菩薩極作敬重頭面禮足發願懺悔一切罪業而作是言我等從今乃至久遠生死流轉隨幾時中亦常恭敬供養仁者以爲左右親友知識兄弟眷屬及作檀越乃至菩薩於阿耨多羅三藐三菩提得成正覺是時仁者於三乘中與我授記以仁者力故我等當於生

死流轉而得解脫入無畏城此是菩薩摩訶薩修第一義時成熟衆生能滿六波羅蜜是故菩薩摩訶薩於諸衆生如十二月如菩薩摩訶薩住於閑林修第一義時所有空行天龍夜叉羅刹阿修羅鳩槃荼餓鬼毗舍遮富單那迦吒富單那於諸衆生獷惡瞋恚無有慈愍不觀後世畏作如是等諸惡形色非威儀事乃至不能惱彼住於閑林修第一義諦菩薩摩訶薩一毛何況能作諸餘惱亂彼等天龍便於菩薩摩訶薩所心得敬信乃至休息十不善道彼等數數向菩薩所發願懺悔一切罪業乃至仁者於三乘中

與我授記我等當於生死流轉而得解脫入無畏城此是菩薩摩訶薩修第一義時成熟衆生能滿六波羅蜜是故菩薩摩訶薩於諸衆生如十三日月如菩薩摩訶薩住於閑林修第一義時彼諸天龍乃至迦吒富單那向彼菩薩摩訶薩邊懺悔業障衆生障法障煩惱障乃至是諸衆生得成熟故能滿六波羅蜜是故菩薩摩訶薩於諸衆生如十四日月如菩薩摩訶薩住於閑林修第一義時彼諸天龍夜叉羅刹鳩槃荼餓鬼毗舍遮富單那迦吒富單那獷惡瞋恚於諸衆生無有慈愍不深敬信不觀後世畏乃至於彼

修第一義諦菩薩摩訶薩所深得敬信尊重敬仰生
希有心一切皆悉棄捨惡業及捨舍宅晝夜詣彼修
第一義諦菩薩摩訶薩所修行如上休息殺生於諸
衆生生悲心利益心憐愍心而住休息偷盜邪婬妄
語此是修第一義菩薩摩訶薩能滿檀那波羅蜜如
彼休息兩舌此是菩薩摩訶薩能滿尸羅波羅蜜如
彼休息惡口此是菩薩摩訶薩能滿羼提波羅蜜如
彼休息綺語此是菩薩摩訶薩能滿毗梨耶波羅蜜
如彼休息貪瞋此是菩薩摩訶薩能滿禪波羅蜜如
彼休息邪見得正見數數作如是願當令我等得無

上智此是菩薩摩訶薩能滿般若波羅蜜如彼天龍
乃至迦吒富單那於彼修第一義菩薩摩訶薩所深
得敬信亦復不勤怖畏刹利沙門婆羅門毗舍首陀
亦不怖畏男夫婦女童男童女亦不怖畏象馬師子
虎豹豺狼麀鹿鳥獸亦不怖畏國土城邑聚落舍宅
亦不怖畏地水火風亦不怖畏藥草林樹花果等物
此是菩薩摩訶薩修第一義時成熟衆生乃至能滿
六波羅蜜是故菩薩摩訶薩於諸衆生如十五日月
一切圓滿如是菩薩摩訶薩住於閑林修第一義諦
速能滿足六波羅蜜譬如十五日月衆星圍遶微妙

可愛如是修第一義諦菩薩摩訶薩爲彼信心諸天龍等乃至迦吒富單那善行圍遶微妙可愛譬如十五日日照除一切無明闇如是修第一義諦菩薩摩訶薩照除天龍乃至迦吒富單那等十不善瞋譬如月體性涼冷能令熱惱諸衆生等身心得樂如是修第一義菩薩摩訶薩令彼天龍乃至迦吒富單那等瞋怒所惱者令住慈心身得安樂譬如滿月令失道者見道如是修第一義諦菩薩摩訶薩令諸失道天龍夜叉乃至迦吒富單那等於天人所皆生慈愍乃至能見於二乘道譬如十五日月一切圓滿照於

一切月愛摩尼寶珠如是寶珠以月光照故能出多水滿於小河及諸大河又滿大海如是修第一義諦菩薩摩訶薩以如是等威儀力故乃至迦吒富單那得深敬信不怖刹利乃至不怖童男童女不怖城邑乃至不怖樹林花果以此因緣人非人等乃至迦吒富單那麀鹿鳥獸各於所須具足充滿以彼所須得充滿故不相惱害身心安樂於十善業道堪能修行乃至於天人中得受果報具足快樂以是因緣於三乘中得不退轉如是諸天人等多得饒益如菩薩摩訶薩住於閑林修第一義能令諸天人等得安隱樂

以是等故速能滿足六波羅蜜是故菩薩摩訶薩當
住閑林修第一義於一切善根三昧陀羅尼忍辱堅
固得住成熟如須彌山王善得安住如是修第一義
諦菩薩摩訶薩於一切善根檀波羅蜜善得安住如
師子獸王以尸波羅蜜降諸煩惱如那羅延以羸提
波羅蜜伏諸三界一切惡見如波利質多羅樹花始
開敷以毗梨耶波羅蜜種種善根花得開敷如日輪
焰光以禪波羅蜜能除一切無明黑闇如十五日月
一切圓滿以般若波羅蜜功德莊嚴所願圓滿如如
意寶能除貧窮以方便力種種善根不可窮盡智財

無滅法願充滿猶如大雲能降大雨如是菩薩摩訶
薩住於閑林修第一義乃能降注諸法寶雨如菩薩
摩訶薩修第一義善能安住於菩薩行一切魔事終
不能動得不退轉於阿耨多羅三藐三菩提亦能圓
滿種種功德寶花莊嚴得到一切諸法智明如幢上
摩尼寶能成一切義如毗沙門王賢瓶能到一切智
炬如得月愛摩尼寶珠在於手中一切所知皆得圓
滿猶如大海亦如冬時著慚愧衣如勇健人巧用種
種堅牢器仗如善化伏藏養育一切衆生如阿那婆
達多池緊那羅等均平受報猶如蓮花諸煩惱泥不

能染汗如寶花聚百千法門種種圍遶猶如寶鬘一切聲聞辟支佛等之所瞻仰猶如泉池淨水盈滿洗除衆生諸煩惱垢如斯陀大河蕩除衆生一切煩惱諸惡見垢如大河中船能渡衆生諸煩惱河如枳薩利師子降伏一切衆邪異道如帝釋金剛杵降伏一切煩惱阿修羅猶如繖蓋遮障衆生諸煩惱雨如大梵王令諸衆生度於流轉生死曠野示涅槃道是名菩薩摩訶薩住於閑林修第一義時成熟如是無量功德如是善男子第一義諦是何句義第一義諦是五根句義第一義諦是三昧根義大慈大悲義深信

一切智義以四攝法攝受一切衆生義護持正法義勤求一切佛法義遠離諸難義住佛功德義超過聲聞辟支佛地義能淨三業義以諸三昧莊嚴心義淨三惡趣令諸衆生捨邪道義信解忍義成熟衆生無生忍義捨離憎愛義於諸法決斷義分別一切法義勤求一切智義得一切助菩提義覺了十二因緣義分別上首義三不護義四無畏義十力義大慈大悲成熟衆生義方便勤求如來十力第一義諦義十地義登祚地義降魔義得一切種智義轉法輪義降法雨義度一切衆生義建立八聖道義第一義諦有如

是等無量大義善男子第一義諦蕩諸結垢滅一切
惡能度衆生煩惱淤泥枯竭愛河超過一切流轉曠
野破諸見網照除無明降伏諸怨斷除憂感諸根適
悅令人正道覺悟諸法增長善根捨諸凡愚入賢聖
位到菩提道善男子如是第一義諦一切功德皆悉
圓滿成熟無上最勝智慧能令衆生到於一切生死
彼岸爾時月藏菩薩摩訶薩白佛言世尊所謂三昧
三昧者是何身是何攀緣是何想是何相是何性第
一義諦是何身是何攀緣是何想是何相是何性佛
言善哉善哉善男子汝於三昧久已修習善根圓滿

汝今爲於諸衆生故問於如來如是等義善男子汝
今諦聽善思念之吾當爲汝分別解說月藏菩薩摩
訶薩白佛言世尊唯然受教佛言善男子諸聲聞乘
三昧者名不善三昧三界身顛倒攀緣不淨想厭離
相不喜樂性地界三昧者不分離身取攀緣重想堅
相碎壞性水界三昧者不離身滿攀緣潤想稀輒
相枯竭性火界三昧者不離身成熟攀緣熱想燒
相盡滅性風界三昧者不離身吹舉攀緣無礙想
急疾相輕舉性分別陰三昧者渴愛身緣起攀緣棄
捨想苦相無我性空三昧者通利法身諸法攀緣無

物想開視相畢竟空性無相三昧者捨三結身涅槃
攀緣空想休息相究竟盡作性如是無願心心法三
昧者五識身因緣攀緣常修行想速疾相無所依性
此等是聲聞乘三昧修是緣起三昧名緣覺乘三昧
安住大乘善男子慈三昧者憶念身衆生攀緣無礙
想無瞋相不濁性悲三昧者憶念身衆生攀緣不害
想救拔相愍惻性喜三昧者憶念身衆生攀緣樂著
想愛樂相常慶喜性捨三昧者憶念身衆生攀緣無
瞋喜相常捨相無功用性念佛三昧者法性身形像
攀緣色處想愛敬相歡喜性念阿那波那三昧者以

身爲身念爲攀緣不住想冷熱相生滅性善男子如
是第一義諦四禪滅空三昧三摩跋提依阿那波那
念何謂阿那波那念阿那言入息波那言出息念謂
心法善男子彼入息出息當修修已身倚心亦得倚
當云何修一者數二者隨順三者止住四者觀相五
者轉還六者快淨數有二種作一者依彼除覺觀二
者取出入息相隨順亦二種作一者依出除覺觀二
者取入息相止住亦二種作一者示現出入息漸漸
減盡二者安住三昧觀相亦二種作一者示現出入
息漸漸減盡二者觀察心心諸法種種別異處處止

住轉還亦二種作一者息三種受二者止三種行以此得淨空三昧何者爲空三昧見諸法無命觀諸法無主於彼得住七種空何者爲七所謂陰空界空入空諦空因緣空法空性空是名空三昧住是空三昧則增長因緣息增長因緣息則事休息事休息故則道休息善男子此是菩薩摩訶薩第四禪不可得無言說得第一義諦三昧非聲聞辟支佛境界菩薩摩訶薩得禪定處畢竟不墮聲聞辟支佛地能滿六波羅蜜於七日夜成熟無量億那由他百千衆生天龍夜叉乃至迦吒富單那等何況能多日夜隨其所有

國土城邑有如是等住第一義禪菩薩摩訶薩於彼國土有十二種功德利益何等十二一者於彼世界國王不瞋惱婆羅門不瞋惱沙門不瞋惱毗舍不瞋惱首陀不瞋惱男夫婦女童男童女及畜生類禽獸等不瞋惱二者於彼國土他方怨敵不來侵國兵仗不起三者於彼國土無賊寇無欺詐無矯誑四者於彼國土惡人不入無諸疫病唯除四大相違病者終不橫死除自報盡五者於彼國土亦無非時風雨寒熱六者於彼國土一切衆生無有瞋惡急躁麤獷顛倒見取爲癡所覆天龍夜叉羅刹阿修羅鳩槃荼餓

鬼毗舍遮富單那迦吒富單那師子白象虎豹豺狼
毒蛇蝮蠍七者於彼國土亦無蚤蚋惡蠅蚤虱蠹鼠
野狐勳胡兔梟及以鷹鷂并餘傷害食苗稼蟲八者
於彼國土花果美味皆悉甘脆無苦辛澀無味等物
亦無饑饉果藥豐饒九者於彼國土大地平正無有
曠野高下險難地無鹽鹵亦無坑澗花果樹林常得
青翠扶踈蔚茂是故衆生不乏衣食所須常得饒益
安樂十者於彼國土人無怨讐鬪諍毀訾亦無言訟
皆生慈心利益心同心喜心施心戒心忍心精進心
禪定心智慧心求法心不違反心勤求三乘心求解

脫心知足心唯除過去諸不善業怨讐心等十一者
於彼國土當得諸佛住世若無諸佛有緣覺住若無
緣覺有聲聞住若無聲聞有五通仙住於彼國土常
有如是應受供人十二者於彼國土無惡名稱不可
樂聲所謂謫罰聲鬪訟聲獄繫縛聲殺害聲著鎧甲
聲捕獵聲偷盜聲罵詈聲忌克聲儉聲饑饉聲少衣
服聲欺凌聲病聲邪姪聲妄語聲兩舌聲麤獷語聲
綺語聲貪聲瞋聲歸依惡天神聲於彼國土常無如
是諸惡邪聲常有如是好聲滿足所謂三寶聲三律
儀聲四梵住聲四攝聲六波羅蜜聲無生法忍聲登

祚聲不受後有聲降魔聲轉法輪聲降法雨聲於彼國土以此諸聲常得充滿修第一義禪菩薩摩訶薩隨所住處於彼國土諸衆生等皆得趣向無上菩提於三界中聲震於世若有菩薩摩訶薩欲得速滿六波羅蜜及欲成熟無量無數萬億衆生速成阿耨多羅三藐三菩提當詣閑林於四聖種相應而住如是菩薩摩訶薩以第一義諦得八地智爾時世尊欲重明此義而說偈言

月藏問尊天人師 願爲我說上月語
云何菩薩住蘭若 云何修習第一義

云何於彼得如月	與義相應無礙智
能成無數億衆生	亦能速滿於六度
斷除煩惱及諸行	佛說修習第一義
見三界苦煩惱火	老病憂悲死熾然
於諸衆生生憐愍	速捨愛取攝因緣
喜樂聖種住蘭若	於第一義常相應
修諸禪者捨六根	亦捨愛取陰界入
三界境界愛盡除	遠離三世及斷常
於禪損滅盡不念	是人得離黑白塵
亦離明闇諸分別	亦常修習第一義

捨離陰界住菩提

於諸世間得如月

國土衆生息驚怖

猶如滿月照世間

如是衆生得安樂

如月性冷焰光明

於諸國土惡聲息

如是功德亦如月

若人修習第一義

微妙音聲滿世間

儉病鬪諍悉休息

令諸衆生向菩提

信順忍成第一義

悟無生忍亦復然

亦以此成無礙智

亦能速滿於六度

亦以此法成衆生

亦以此法速成佛

聲聞不善處

顛倒亦應離

地界不分離

堅重碎壞性

水界不分離

稀潤枯竭體

火界燒煑熟

熱想盡滅性

諸陰是愛性

因緣得休息

空有於七種

法物令開現

無相除渴愛

休息於諸結

捨諸集因緣

皆以無願力

修習因緣起

唯是緣覺乘

大乘諸衆生

修行諸梵住

安般念三昧

開示於身心

心能住無事

休息三種取

不可得言說

是名第一義

非彼二乘地

安住此實際

若以此三昧

成熟無數衆

名稱滿於中

是人速成佛

是故若欲滿

檀等波羅蜜 及欲成佛道 常樂阿蘭若
若常樂蘭若 修諸聖德行 速捨諸緣礙
得成佛菩提

爾時世尊說是第一義時於彼衆生五百七十菩薩
摩訶薩曾於過去修此法者一切皆得無生法忍復
有六千六百千頻婆羅菩薩摩訶薩曾修此法彼等皆
悉於十地行得自然智復有六千六百千由他頻婆
羅衆生曾於過去修四梵住及四無礙彼等皆得月
藏三昧自然成熟得八地智復有八萬四千比丘得
盡諸漏心得解脫如恒河沙數諸衆生等未發無上
菩提心者皆於阿耨多羅三藐三菩提得不退轉
大方等大集月藏經卷第三

音釋

塵瞪

瞪於計切
天陰塵也

豺狼

豺狼皆切狼魯
當切並獸名

麤

諸良切
麤屬

獷

獷倉胡切大也
獷古猛切惡也

蝮蠍

蝮房六切蠍許蜀
切蝮蠍並毒蟲也

蝨

切蝨

類蝨

昨誤切
斯也祚位也

大方

金沙居士王訥吾捐資刻此
大方等大集月藏經卷第三

計字九千六百
該銀五兩七錢九分九厘

願生

契悟

妙心世世常聞正法
丙戌年六月

日識

大方等大集月藏經卷第四

高齊天竺三藏那連提耶舍譯

令魔得信樂品第六

爾時有一帝釋天王名曰火光與大衆集在於會坐
白憍尸迦帝釋言憍尸迦此魔波旬爲當欲令住於
閑林與第一義相應菩薩摩訶薩等得三昧故勤作
惱亂爲欲退彼三昧故也時憍尸迦答彼火光天帝
釋言是魔波旬於四天下一切處中令諸衆生退失
留難善朋黨故勤作惱亂又令退失留難檀波羅蜜
乃至般若波羅蜜故勤作惱亂復令退失天人種故

三種菩提故增長三惡道故勤作惱亂魔諸眷屬亦復如是爲欲增長一切衆生大苦海故勤作惱亂憍尸迦說是語已于時一切諸來大衆皆以慈心瞻視魔王有諸菩薩摩訶薩等慈愍勸諫魔王波旬是時火光帝釋復與一萬帝釋天衆悉共合掌向魔波旬作如是言大王慶喜慶喜於三寶中應生信敬是時娑婆世界主大梵天王與六十億百千梵衆及四天王慈心眼視魔王波旬亦作是言慶喜慶喜汝魔波旬若於三寶不得信敬未來長夜有大損失無所利益墮諸惡道是魔波旬爲彼一切諸來大衆各各皆

以慈心眼視及諸菩薩摩訶薩等釋天梵天護世四王勸諫之時從座而起合掌向佛頭面禮足而說偈言

智者一向棄王位

以有煩惱嫉妬慢

故令失壞勝善道

墮墮諸惡不善趣

我以富貴狂因緣

於善導師多留難

遮障衆生諸善業

初不見佛起瞋心

世尊一向常忍辱

慈悲憐愍諸衆生

等心一切已慢除

枯竭衆生煩惱海

唯佛燒盡煩惱薪

能示人天解脫道

令億衆生度有海 我盲無智入闇冥
我今啓請諸大衆 願以慈愍助我等
謝過如來住堅信 更不重起惱亂心
我今一向護佛法 熾然光顯正法眼
自捨所有貪妬慢 懺悔無餘諸罪業
我今發大菩提心 及勸一切衆生等
自修精進滿六度 置彼衆生於八道
我爲一一衆生故 演說無量諸法門
隨所能令入法城 如是勤勸一切衆
未曾見有如此會 悉能淨信於三寶

由我惡心被馱賤 故今捨之及衆過
從今永住淨信心 願後更不被馱賤
心與聖德常相應 不復造作衆惡業
爾時魔王說此偈已卽向佛所到已禮拜而說偈言
我於世尊作留難 願以上忍見容恕
救孤獨者受我懺 大智慈仁不懷瞋
爾時一切諸來大衆咸同一音而白佛言婆伽婆唯
願容恕魔王波旬魔今深信誠心懺悔當持佛法熾
然法眼令世尊法久住於世復使人天長夜當得利
益安樂爾時世尊以偈答曰

忍為世間最	忍是安樂道	忍為離孤獨
賢聖所欣樂	忍能顯眾生	忍能作親友
忍增美名譽	忍為世所愛	忍得富自在
忍能具端正	忍能得威力	忍照於世間
忍得諸欲樂	忍能成工巧	忍力降伏怨
及以除憂惱	忍得好容色	忍能具眷屬
忍招諸勝報	忍能趣善道	忍得人樂觀
忍能得妙好	忍能息諸苦	忍得壽命長
忍得大梵王	忍得欲自在	忍得天帝釋
輪王具神通	忍得人中主	忍力難降伏

忍得龍夜叉	修羅中自在	忍能息諸怨
不害於眾生	忍能離偷盜	忍能捨姪欲
忍能止妄語	兩舌綺惡言	忍能除貪瞋
及離邪見意	忍力成施戒	精進及禪那
般若波羅蜜	能滿此六度	忍能除諸惑
忍得羅漢樂	亦得辟支佛	及住無生忍
忍能具十地	速得菩提道	忍於諸眾生
得為無上勝	忍能降伏魔	及伏諸外道
忍能於世間	轉最無上輪	忍令多眾生
枯竭三惡道	忍斷煩惱障	及能淨法眼

忍授衆生記 三乘隨所求 忍能伏剛惡

夜叉羅刹等 忍與種種人 授記最勝道

忍已降諸怨 亦能滅衆惡 忍能息一切

非時暴風雨 忍能作大集 此諸所來衆

我怨汝波旬 於我諸獷戾 但自謝已心

是我第一怨 今於大衆前 證知勸誡汝

莫壞我所習 一切佛法

爾時一切諸來大衆天人阿修羅乾闥婆等同聲歎

言善哉善哉婆伽婆如來常於一切衆生慈悲憐愍

以諸善法饒益安樂魔王波旬常於世尊起憎惡心

怨心害心與諸衆生爲惡知識於諸善法常作留難

今住不善時有梵天名曰威德白不動大梵天王而

說偈言

如空無邊亦無等 一切衆生所依住

佛智如是不思議 於一切法到彼岸

世尊有歎檀行處 憐愍一切衆生故

以檀得爲功德士 速能滿諸波羅蜜

或有廣說戒忍進 及以禪那般若等

世尊於此一一中 具足能顯於六度

如來唯以禪定法 說能趣向善提道

是故常應樂住禪 速能證於大菩提

爾時復有一切梵王諸帝釋王諸餘天王諸龍王諸
夜叉王諸阿修羅王諸迦樓羅王諸緊那羅王諸乾
闥婆王諸摩睺羅伽王諸羅刹王諸鳩槃荼王諸餓
鬼王諸毗舍遮王等從座而起向魔波旬合掌而禮
作如是言大王敬信敬信牟尼世尊以此世尊解脫
諸過到於一切功德彼岸慈悲憐愍諸衆生等施一
切樂覺了諸法捨諸流轉住於彼岸又言大王若有
衆生乃至一念深信如來敬仰尊重歎未曾有以敬
信故得作輪王統四天下七寶具足乃至得作帝釋

天王欲自在主魔王波旬娑婆界主大梵天王何況
常能具信三寶是故大王應捨魔見諸惡濁心具足
淨信於生死流轉富貴自在受諸果報後成正覺能
施衆生一切安樂得爲世間無上福田爾時魔王復
與諸臣頂禮佛足專心敬信牟尼世尊慇懃懃謝爾
時世尊以偈告曰

惡心奸慧汝當起 我常容忍天人證

至心修行菩提道 汝當作佛無邊慧

爾時魔王極生淨信卽持無價摩尼寶鬘無價咽瓔
珞臂瓔珞脚瓔珞及以指鬘奉獻世尊合掌而禮作

經

大正藏經卷四

王

摩四

經

大正藏經卷四

王

摩四

如是言我昔於佛多作留難爲欲破壞正法眼目斷
三寶種壞滅法炬何以故遠離善法迷惑心故今於
三寶深得敬信本昔所作一切業障今已懺悔已發
阿耨多羅三藐三菩提心蒙得授記唯願世尊哀受
我等摩尼寶鬘瓔珞指鬘爾時世尊慈悲憐愍魔波
旬故卽便受之爾時魔王心生大喜作如是言若佛
所有聲聞弟子比丘比丘尼優婆塞優婆夷若復餘
人宴坐閑林與第一義相應住者現在未來若魔魔
子魔婦魔女魔諸左右男夫婦女及依魔住所有衆
生若天天子天婦天女天諸左右男夫婦女若龍龍
子龍婦龍女龍諸左右男夫婦女乃至迦吒富單那
若子若婦若女若諸左右男夫婦女燒亂衰害取其
精氣氣噓其身散亂其心若奪衣服飲食湯藥若教
他奪若奪其味若以鼻嗅若放臭氣滿其住處若復
見彼住於閑林比丘比丘尼優婆塞優婆夷及餘衆
生修第一義者若不勤作供給供養衣服飲食及以
湯藥我當令彼若魔魔子乃至迦吒富單那左右男
女得頭病眼病耳病腹痛病如是等病之所逼惱退失
神通不復能得飛空遠遊一切方所皆悉闍冥魔王
波旬作是語已卽說呪曰

菴摩差

又戒切

曷囉摩差

菴摩摩囉差

莫义鞞闍

婆帝

莫义蘇兜帝

阿婆羯徒

阿婆坻

時那

起

上支切

那

摩伽娑婆犀

頰囉棄摩那底栗

浮

闍跋囉坻泥

阿佉嘍差

摩佉跛彌

陀羅阿鞞

斯囉佉鞞

娑牟達囉佉鞞

畢唎剌毗

涅寐帝

鬱持迦涅寐帝

坻闍涅寐帝

婆耶婆涅寐帝

阿迦奢姝囉

涅寐帝

分示

那囉夜拏佉婆涅

文支

摩醯首婆囉

涅文支

阿娑遮婆

涅文

支 薩兜婆

僧棄耶跋柘涅文支

鉢囉摩頰他

涅文支

鉢囉伽拏

鉢囉頰他

涅文支

多

波跋囉多

涅目多鉢囉摩頰他

涅文支邏

蘇

婆訶

爾時一切諸來大眾於中所有惡行惡心於諸眾生
 無慈悲者皆悉驚怖魔王波旬復作是言若有違我
 此教令者當得如上眾病等惱復次世尊我今攝護
 佛子聲聞伏諸惡行不令現在及未來世作諸衰惱
 能使世尊法眼久住令三寶種不斷於世爾時世尊
 復讚魔言善哉善哉如是波旬汝於長夜具大功德
 無復諸惡一切衰惱爾時一切諸來大眾諸天及人
 乾闥婆等皆悉讚言善哉善哉魔王波旬能於三寶

深得淨信如是佛法長夜熾然天人當得入無畏城
閉塞惡道常開善趣解脫之門於四天下所有鬪諍
疫病饑饉非時風雨皆得休息又令四天下常得安
隱豐樂可樂多衆盈滿爾時魔王禮世尊足右遶三
匝退坐一面爾時大衆欲重明此義以偈頌曰
魔心決定得歡喜 懺謝如來及眷屬
真心踊悅作是語 慈悲人前捨諸惡
猶如虛空無邊際 佛智境界亦如是
覺了無邊諸法已 於世說法最第一
或有說檀勝無等 以檀能得妙菩提

或復有說尸羅忍 精進禪定及智慧
如是種種方便說 示現無等大菩提
天人修羅應當知 世尊降伏自在魔
此經佛說忍爲最 能得一切安隱樂
忍能休息諸煩惱 能示勝妙解脫城
卑心合掌咸向佛 懺悔已作諸惡業
當發最勝菩提願 我等必當作導師
自然如來授記已 魔王速成等正覺
及餘百千衆生等 亦與無上菩提記
已滿忍辱波羅蜜 速爲無等大導師

與諸善法作依止

護諸聲聞故說呪

若魔依魔諸神鬼

夜叉修羅富單那

如有惱害佛子者

當以惡病著其身

一切大衆皆踊悅

歡喜咸作如是言

以此業故法熾盛

則得久住於世間

魔王安住淨忍心

三寶水泉難枯竭

當息世間一切濁

饑饉暴風及亢旱

是故人天得諸樂

本所修習忍辱行

樂檀尸羅忍方便

到進禪智大彼岸

爾時世尊顯說如是忍功德時九百八十萬諸天人

等曾修忍者一切悉得無生法忍十頻婆羅百千人
得柔順忍億那由他百千人得須陀洹果過於數
量諸衆生等得世正見十頻婆羅百千人阿修羅
夜叉羅刹昔未發阿耨多羅三藐三菩提心者悉得
發心及不退轉百萬衆生得授阿耨多羅三藐三菩
提記

一切鬼神集會品第七

爾時護世四大天王從座而起合掌向佛頭面禮拜
作如是言婆伽婆此閻浮提種種國土城邑村落園
林寺舍山澤等處所有諸惡天龍夜叉羅刹阿修羅

鳩槃荼餓鬼毗舍遮富單那迦吒富單那依彼住者
瞋惡獷戾無慚無愧於諸衆生無有慈愍常害他命
及作惱亂彼諸天龍乃至迦吒富單那等於閻浮提
非時數數起於亢旱惡風雹雨聞暄灰塵嚴寒毒熱
以是災害壞諸苗稼五穀花果蒲萄甘蔗劫具等物
故令衆生多有種種饑饉疫病愛別離苦衆惱逼切
各各迭相怖懼鬪戰心常恐畏諸王刹利於已眷屬
五欲衆具不生喜樂於已國土觸惱一切沙門婆羅
門毗舍首陀男夫婦女童男童女亦復觸惱象馬牛
羊師子虎豹豺狼狗犬一切禽獸皆令觸惱於諸衆

生種種因緣而逼惱之晝夜殺害燒煮割截五穀財
帛所欲供具身心樂事及諸善行皆悉損減以是因
緣令人天等善趣減少又令閻浮提善事滅故不可
愛樂我等一切不能遮護今此世尊大集之處一切
大士菩薩摩訶薩諸聲聞衆皆悉雲集一切天王及
與眷屬一切龍王阿修羅王乃至一切毗舍遮王悉
與眷屬皆來集會世尊彼等於此閻浮提一切國土
城邑村落山谷寺舍園林之處唯願世尊分張付囑
天龍夜叉羅刹阿修羅鳩槃荼餓鬼毗舍遮等各令
護持若彼天龍乃至毗舍遮於閻浮提作於一切鬪

諍觸惱非時風雨疫病饑饉寒熱等事各各隨分而
遮護之若於閻浮提所有鬪諍觸惱疫病饑饉非時
風雨寒熱等事皆悉休息令閻浮提所有花果藥草
劫貝財帛五穀甘蔗蒲萄及酥蜜等皆得成熟所有
苗稼不令衰壞於閻浮提諸處人中及麀鹿鳥獸隨
其所欲皆無乏少以無乏故令彼衆生修諸善行修
正法行修真實行動修而住令彼諸善增長不退以
是因緣此閻浮提安隱豐盛人多盈滿甚可愛樂世
尊正法則得久住一切人天所願滿足衆生悉得趣
向善道及涅槃道離三惡趣令三寶種得不斷絕爾

時四天王欲重明此義以偈頌曰

於此閻浮提	所有諸國土	惡天龍夜叉
羅刹鳩槃荼	餓鬼毗舍遮	迦吒富單那
瞋惡無恩養	無慈於衆生	彼等無慚愧
觸惱諸刹利	沙門婆羅門	毗舍及首陀
師子象虎豹	非時惡風雨	疫病及饑饉
能令衆生苦	彼等害衆生	毀壞於世間
殘害諸苗稼	及滅正法燈	我等四天王
不能遮此惡	願佛當分布	國土城邑等
付囑龍夜叉	羅刹鳩槃荼	令彼各遮護

非時惡風雨 息諸怖畏惱 今無病饑饉
花果藥苗稼 充足衆美味 衆生不乏少
所用諸供具 一切善法增 今得可樂事
佛法得常住 衆生趣善道 三寶種不絕
願佛常哀愍 大地具衆美 離諸苦辛味
花果皆具足 種種味充滿 泉池陂河等
淨水常充滿 於諸苗稼等 不能奪精氣
彼所進飲食 心輒無麤穢 慈念常相向
流轉淨無垢 捨家衆事業 住於阿蘭若
勤修菩提行 今多衆生信 法朋得增益

今魔衆損滅 四天下豐樂 諸處人充滿

爾時世尊問四天王釋提桓因娑婆世界主大梵等
言諸天王輩若見若聞此賢劫初拘留孫佛及拘那
含牟尼佛迦葉佛等出現世時云何以此閻浮提中
所有天龍夜叉鳩槃荼等分張付囑爲如我今菩提
樹下初成正覺以此一切閻浮提中天龍夜叉鳩槃
荼等分張付囑安置不也如是問已四大天王釋提
桓因娑婆世界主大梵王等白佛言大德婆伽婆我
等見聞此賢劫初拘留孫佛菩提樹下初成正覺以
此閻浮提天龍夜叉鳩槃荼等分張付囑如今世尊

經 卷四

菩提樹下初成正覺以此閻浮提天龍夜叉鳩槃荼
等分張付囑等無有異彼拘留孫佛出現世時衆生
壽命四萬歲彼時大地精氣衆生精氣法精氣等力
得增上味增上威增上德增上慈增上勝增上智增
上如是等事皆得增上爾時依地果味衆花藥等衆
生食者皆得輒心慈心悲心喜心捨心施心戒心忍
心精進心禪定心智慧心離殺生心乃至離邪見心
少欲知足少煩惱垢多福長壽離欲閑居愛樂正法
厭患流轉熾三寶種以是因緣得離惡道趣向善道
爾時諸天乃至迦吒富單那一切禽獸悉得具足如

是等事次後衆生名壽損減名壽損減故福德損減
福德損減故地味精氣損減地味精氣損減故衆生
精氣損減衆生精氣損減故衆生心法作善慚愧損
減衆生心法作善慚愧損減故正法甘露精氣損減
彼諸衆生名壽損減乃至正法甘露精氣損減故廣
作殺生乃至邪見乃至禽獸亦復如是如是衆生遠
離善道及涅槃道趣向惡道彼命終已生惡道中若
彼衆生生於夜叉乃至迦吒富單那中者瞋惡無慈
不觀後世可怖畏事廣作殺生乃至邪見彼等衆生
於閻浮提未得入於付囑護持分中如是拘那含牟

尼佛迦葉佛於菩提樹下初成正覺以此閻浮提天龍夜叉鳩槃荼等分張付囑如今世尊於道樹下初成正覺以此閻浮提天龍夜叉鳩槃荼等分張付囑等無有異如是白法漸減黑法增長從是以來無量那由他百千惡龍夜叉乃至迦吒富單那生長蕃息常瞋獷惡不懷慚愧於諸衆生無有慈心不觀後世可怖畏事殘害他命食其血肉彼等不入分布分中無定住處此惡龍等不守護人乃至畜生常欲奪人精氣斷他命根滅壞國土城邑村落寺舍等處能令諸王瞋惱乃至能令畜生等惱又復能令非時風雨

嚴寒毒熱壞滅一切花實苗稼如是惡龍乃至迦吒富單那等不受我教我於彼等不得自在是故於今五濁極惡白法損減如來出世一切衆生於慈導師得生敬信尊重愛樂佛所發言稱機利益具足功德智慧之聚得成大悲六波羅蜜相應究竟所願得滿獲六神通於法自在覆護攝受一切衆生能與衆生一切善道及涅槃樂今者於此大集未曾之有昔來未聞如是大集一切天王及與眷屬皆來集會一切龍王乃至日王夜叉王羅刹王阿修羅王乾闥婆王緊那羅王迦樓羅王摩睺羅伽王鳩槃荼王餓鬼王

毗舍遮王悉與眷屬皆來集此所未來者今願世尊以神通力盡皆攝之若有諸惡鬼神無所繫屬不受他教瞋惡麤獷無有慈愍不觀後世可怖畏事殘害他命飲血食肉所不來者唯願世尊當復慈愍以神通力令彼鬼神及其眷屬皆來至此使得分布入他分中不令數數惱亂衆生以此方便令四天下大地餘味而不速滅精氣安住不復損滅以地精氣不損減故衆生精氣不損減衆生精氣不損減故正法甘露精氣不損減正法甘露精氣不損減故衆生心法作善平等增長以是因緣令三寶種得不斷絕如是

如是法眼久住閉三惡道開於善趣及涅槃門如是如是白法增長黑法損滅如是如是天人增長無量天人悉得充足涅槃快樂四天王等說是語時世尊觀察默然不言爾時娑婆世界主大梵天王憍尸迦及諸釋天四大大天王皆共合掌告諸大眾我等咸白一切菩薩摩訶薩一切聲聞一切天龍夜叉羅刹乾闥婆阿修羅緊那羅迦樓羅摩睺羅伽餓鬼毗舍遮富單那等一切大眾願悉勸請如來法尊當使世尊令諸天衆悉集於此一切龍衆乃至一切迦吒富單那等亦悉來集彼等於闍浮提所有國土城邑村落

寺舍園林山谷曠野河井泉池如是等處遊止住者
分張付囑令彼一切諸善天龍乃至一切迦吒富單
那分取安置各自當分平等守護不令縱捨不令生
惱各各教彼同行其法常作善念折伏惡心復令各
各護持自分而不縱捨不惱於他彼若各各當分平
等作護持者名稱流布得大勇猛獲大福報爾時一
切菩薩摩訶薩一切聲聞一切天龍夜叉羅刹阿修
羅迦樓羅緊那羅乾闥婆摩睺羅伽鳩槃荼餓鬼毗
舍遮富單那迦吒富單那乃至一切諸來大眾歡喜
踊躍從座而起合掌向佛一時同聲作如是言我等

勸請如來應供正遍知愍我等故利衆生故得大悲
心一切諸天乃至迦吒富單那悉令集此彼等於此
閻浮提中城邑村落乃至依止泉池住者分張付囑
令彼天龍乃至迦吒富單那分取安置若彼諸天乃
至迦吒富單那等各捨已分猶作惱害不遮惱他應
當治罰而折伏之願佛發勇作大佛事一切盡皆分
張安置爾時世尊說偈答曰

於此佛法中 無有惱他義 度於苦彼岸
諸處心平等 諸法無有二 導師捨憎愛
一道如虛空 此是佛境界 若有有爲心

思惟去來事 彼以法非法 能攝鬼神來

爾時復有一大梵天名曰正辯住第十地聖無上聖以諸菩薩功德莊嚴在會而坐此正辯天白諸天王一切龍王一切阿修羅王乃至一切迦吒富單那王作如是言汝等如是今從如來得聞是義如佛世尊若行若住若坐若臥不惱衆生汝等今悉一時同聲發願怖求應當說言所有非人一切天龍鬼神所攝常食精氣惱害於他食肉飲血者彼等一切願護世四王力勢折伏所有化生濕生胎生卵生如是隨其所有諸龍夜叉羅刹阿修羅迦樓羅乾闥婆緊那羅

摩睺羅伽鳩槃荼餓鬼毗舍遮富單那迦吒富單那一切等類四生所依彼等悉爲四大天王力所攝伏願四大王攝彼一切所不來者悉至於此爾時一切天王乃至迦吒富單那王作是願言除三十三天以下所有四天天王及諸龍衆乃至迦吒富單那四生所依一切無餘悉願依於四大天王彼等四王力所攝伏若有諸天乃至迦吒富單那等於四天王如有違反一一王力不受教勅卽當爲彼熾然鐵輪截其耳鼻若截耳鼻猶故違者復令鐵輪截彼手足若截手足猶故違者復斬其首若有乃至違四天王教勅

之者必令如是爾時毗沙門天王卽以熾然焰赫鐵輪向於北方而遙擲之卽說呪曰

多地夜他 窮窮尼邏窮其鳳切 义婆窮 迦佉伽

伽泥 迦佉闍羅廁 蘇婆訶

爾時毗樓博义天王亦以熾然焰赫鐵輪向於西方而遙擲之復說呪曰

多地夜他 尸梨器 尸羅器 伽伽那 尸梨器

义尸邏器底 闍利 蘇婆訶

爾時毗樓勒天王亦以熾然焰赫鐵輪向於南方而遙擲之卽說呪曰

多地夜他 闍邏鼻唎師 闍囉鼻唎師 悉多婆

闍囉鼻唎師 達囉尼 闍囉闍囉 鼻唎師

蘇婆訶

爾時提頭賴吒天王亦以熾然焰赫鐵輪向於東方而遙擲之卽說呪曰

多地夜他 阿那易七利切 阿那阿那耶 阿那浮毗

阿迦奢浮毗 摩系 都易 蘇婆訶

爾時四方諸天乃至迦吒富單那及諸小樹林藥草神等遙見鐵輪熾然焰赫悉大驚懼愁憂不樂恐命不存觀十方已各作念言誰當有能救於我等爲歸

爲趣施我等命卽便觀見大悲世尊如實利益諸衆
生者佉羅帝山牟尼諸仙所依住處大衆悉集圍遶
而坐唯彼當能救我等命卽往佛所疾如電光到佛
前住如是十方所有諸天乃至迦吒富單那等皆往
佛所到已而住爾時世尊欲重明此義而說偈言

時我兩足尊 問釋梵四王 爲見爲聞彼

過去諸導師 分布四天下 爲今天等護

可不如我今 道樹下分布 天王答我言

如是昔諸佛 坐於道樹下 分與夜叉等

後因過及時 轉生諸雜惡 鳩槃龍夜叉

羅刹鬼單那 獷惡無慈愍 常食他血肉

彼惱於諸國 及惱四姓人 非時作風雨

及以寒熱等 饑饉病鬪諍 滅壞大地味

無慈於一切 惱害多衆生 莫能遮護者

不伏於我等 是以地精氣 衆生精氣沒

正法妙精氣 難得者日損 時過因緣故

天人等損減 增長諸惡世 法朋難可得

法不久住世 滅壞正法燈 斷絕三寶種

世間當盲冥 今佛大勇猛 於白法盡時

出現闍浮提 大悲衆生樂 中言具六通

究了諸法岸 利益衆生故 作此大集會

一切天龍王 護世等來集 諸鬼惡無慈

恒食他血肉 龍鬼富單那 彼等不來此

無所受教令 不依屬他分 一切受佛語

令彼皆來集 願分於彼等 各令有所屬

不令更惱害 奪他精氣等 三種精氣住

令人修法行 白法得增長 黑法得消滅

以是惡道息 天人得增益 解脫門得開

三寶種熾然 福流諸衆生 速能得解脫

于時我默然 不隨於彼等 梵王諸帝釋

四大護世王 俱白一切衆 所來在會者

勸請天人師 攝諸鬼來此 分張付囑彼

城邑諸村落 晝夜常護持 各令住自分

菩薩等大衆 從座起合掌 勸請大導師

攝諸鬼來此 一切分作分 護持閻浮提

勿惱於衆生 發勇人中上 我不惱亂他

遠離去來事 了知法無二 離諸衆生想

正辯大梵天 告諸天王言 導師不惱他

佛法無此事 悉共發願言 令鬼不爲惱

分布各依止 彼四天王等 諸王作是言

我今依汝語 誓勅於彼等 悉令得作分
 若彼不依教 速爲輪所燒 于時四天王
 使輪向四方 乃至一時頃 盡皆到佛所
 頂禮世尊足 合掌於彼住

大方等大集月藏經卷第四

音釋

戾 力齊切 饑饉 饑居依切 穀不熟也 稼 古訝切 禾
 很戾也 饑饉 饑居依切 穀不熟也 稼 古訝切 禾

稼

金沙居士王訥吾捐資刻此

大方等大集月藏經卷第四 計字七千二百
 九十五箇 該銀四兩三錢七分七厘 伏

願生生契悟妙心世世嘗聞正法 日識
 丙戌年六月

大方等大集月藏經卷第五

高齊天竺三藏那連提耶舍譯

諸惡鬼神得敬信品第八上

爾時護世四天王見於無量阿僧祇衆天龍夜叉
 乃至迦吒富單那等種種色種種形種種欲種種行
 種種性彼等衆生性無慈愍於諸衆生常起瞋恚惱
 害之心不觀後世可怖畏事無所繫屬無所護持是
 等恒常觸惱刹利乃至畜生奪其精氣食其血肉是
 四天王見諸鬼神俱來集已歡喜踊躍各自問其所
 領大將毗沙門天王問於散脂夜叉大將言此四天

下一切所有夜叉羅刹若卵生胎生濕生化生或依城邑聚落舍宅塔寺園林山谷河井泉池陂澗冢間樹下曠野田中閑林空舍及大海內衆妙寶洲彼諸鬼神若在地行水行空行一切無餘今悉來集世尊所不散暗大將言大王如王所言此四天下所有夜叉乃至大海寶洲若地行水行空行一切無餘今悉來集在世尊所提頭賴吒天王問於樂欲乾闥婆大將言此四天下一切所有乾闥婆衆餘如上說毗樓勒叉天王問於檀帝鳩槃荼大將言此四天下一切所有鳩槃荼衆餘如上說毗樓博叉天王問於善現

龍王言此四天下所有龍衆摩睺羅伽迦樓羅諸餓鬼等若卵生胎生濕生化生或依城邑聚落舍宅乃至海內衆妙寶洲若在地上水中空中所遊行者一切無餘今悉來集世尊所不善現龍王言大王如王所言此四天下所有諸龍乃至餓鬼一切無餘今悉來集在世尊所爾時四大天王釋提桓因大梵天王正辯梵天合掌向佛而作是言大德世尊此四天下所有天龍乾闥婆緊那羅夜叉羅刹鳩槃荼毗舍遮摩睺羅伽迦樓羅諸餓鬼等若卵生胎生濕生化生所有地行水行空行一切無餘今悉來集在世尊所

我等大眾皆同勸請唯願如來哀愍我等慈悲一切諸衆生故令惡衆生得敬信故令正法眼得久住故紹三寶種不斷絕故彼地精氣衆生精氣正法勝味甘露精氣令得久住利益增長故又令善道及涅槃道常不滅壞利益增長故大德世尊此閻浮提一切城邑聚落舍宅乃至寶洲一切無餘天龍夜叉乃至迦吒富單那等今悉來集天王龍王乃至毗舍遮王悉將眷屬亦皆來集唯願世尊付囑此王同行其法憶念攝受令彼天龍夜叉羅刹乃至迦吒富單那等各有所屬隨於已分養育護持恒常不捨莫令惱他見惱他者令其遮護常不捨離使得安隱若彼各各於其已分勸發勇力平等護持彼等則得喜樂名聞多受福報爾時世尊受其勸請慈悲憐愍彼一切故遍觀大眾觀大眾已舉其右臂而作是言汝等賢首一切大眾各各諦聽我當解說佛出世難如優曇華離八難難如順時香樹聞正法難如雨閻浮檀金遇戒定僧得供養難如入大海詣妙寶洲信敬三寶難如求如意珠布施三寶難如求功德天賢瓶受持戒難如牛頭栴檀國難可得到於衆生所起慈悲難如值勇健怨賊執金剛杵難得脫免謹慎知足難如善

作馬祀

梵語阿濕婆迷陀耶若此云馬寶柱祀爲此祀者唯閻浮王之所能也

諸仁者

有十種平等若諸眾生具十平等於生死中恒受勝報速能得入無畏大城何等爲十一者眾生平等二者法平等三者清淨平等四者布施平等五者戒平等六者忍平等七者精進平等八者禪平等九者智平等十者一切法清淨平等諸仁者於彼何者是眾生平等若有眾生爲求身命受樂離苦應作是見若受者作業若身口意若善不善自作教他彼受現報及後世報是故汝等若欲離苦求二世樂應當造作身口意善莫起諸惡若求二世自益益他自樂樂他

自好好他勿作諸惡此是眾生平等諸仁者於彼何者是法平等若有眾生求樂離苦欣生畏死思愛不離怨憎不會如此之人心海所溺何以故若有眾生計著我者生死流轉不見清淨解脫道故是故於法平等思惟觀察眾生不離法法不離眾生若眾生體性卽是我體性若我體性卽是一切法體性若一切法體性卽是佛法體性若如是觀諸法平等是人得無所有不見眾生亦無眾生去來合散亦不見有眾生可得非法非非法是人如是得住無相此是法平等諸仁者於彼何者是清淨平等謂得人身具滿十

德何等爲十一者離下賤家二者不鈍三者不瘞四者諸根不缺五者得男子身六者顏容端正得好眷屬七者不貧八者不爲他欺九者發言有中十者多人樂見何以故言得於人身清淨平等如得人身得三律儀離三惡道能求三乘以此則得三種菩提不以餘法云何清淨平等能到菩提是人令心不依諸法令心不依內外境界不依如如見一切法無和合相不取內心不取外心於二境界極得寂定如是清淨正見理時不見有我內有衆生外有命者壽者生者人者衆數養育作者使作者起者使起者受者使

受者知者見者此十六名皆出妄想是人如是於諸衆生得見無我清淨平等以是義故離欲清淨不起邊見如是得入衆生清淨平等及諸法空無行智印無相無願如是得入衆生清淨平等復以彼法成熟衆生而不自壞亦不壞財若知衆生體性平等則知一切法體性平等若一切法體性平等卽是佛法體性平等是故一切諸法名爲佛法此是清淨平等諸仁者於彼何者是布施清淨平等謂四種心清淨布施以布施故衆生於流轉時恒受勝報速能得入無畏大城何等爲四一者於一切衆生起憐愍心二者

平等心三者大慈心四者大悲心憐愍心清淨平等者若有衆生求樂離苦恩愛不離怨憎不會長壽利益名譽流轉富貴五欲悉稱心者應如是學如我喜樂愛欲自己身命以一切方便無上護持無有價量如是於一切衆生一一衆生乃至蟲蟻亦皆喜樂愛欲自己身命一切方便無上護持無有價量我若惱害衆生若復奪他活命之具及斷命根我於億百千世生死流轉還被惱害失活命具及斷命根受無量苦我從今日於諸衆生起父母想及男女想乃至蟲蟻亦作父母及男女想是故更不惱害衆生亦不奪

彼活命之具及斷命根亦不教他奪人精氣及斷命根如是我當億那由他百千萬劫生死流轉無能惱害亦不被奪活命之具及斷命根何以故一切衆生無一衆生非我父母兄弟男女如是我於一切衆生無一衆生非是父母兄弟男女以是義故我曾與彼一切衆生無非是親一切衆生亦曾與我無非是親若於父母乃至男女作惱害者是義不然諸仁者於彼何者是不觸惱若諸衆生求樂離苦應如是學我若於剎利觸惱其心令彼剎利於已境界國土人民本所欲者不生喜樂及婆羅門乃至畜生觸惱其心

本所欲者不生喜樂以是因緣遞相征伐鬪亂諍訟
胆佞妄語互相支解及斷命根以是因緣我從今日
於諸衆生休息惱害及斷命根以此清淨平等布施
業因緣故我當久遠生死流轉無能觸惱共我鬪亂
諍訟及斷命根以是義故名不觸惱諸仁者於彼何
者是不害命若諸衆生求命不害應如是學一切衆
生無非我親我若暴雨或非時雨若雨灰塵令多闇
暄或久亢旱枯涸流泉令諸華果藥草五穀衆味損
減以是因緣令我親知饑饉困苦動其四大發種種
病乃至命終若加此害是義不然以是義故我於衆

生遠離害命以不令彼地味精氣有損減故使我親
知無饑饉苦不動四大種種病生及不橫死以是清
淨平等布施乃至久遠生死流轉不受饑饉病死等
苦以是義故名不害命諸仁者於彼何者非是奪他
活命之具若諸衆生求身命者應如是學一切衆生
無非我親我若奪其花果藥草五穀精氣活命之具
彼諸衆生若以食彼無好精氣花果藥草五穀味故
其身損瘦無有勢力失念惡性輕躁麤獷萎黃少色
生種種病若加此苦是義不然故我應受彼先聖
諸天教勅於彼衆味准應得取第六十四一分精氣

以活身命六十三分地味精氣留活衆生令受安樂
我以知足業因緣故乃至久遠生死流轉不復更瞰
無好滋味無精氣食以其食故具威德力能強記念
心性柔軟顏容端正無諸病苦是名不奪活命之具
諸仁者於彼何者是命不別離若求命者應如是學
一切衆生無非我親若惡心眼視及以氣噓令其失
心於身支節奪其精氣使我親知身心受苦是義不
然以是因緣我當久遠生死流轉無有非人氣噓眼
視散亂其心奪其精氣以是故名命不別離諸仁者
於彼何者是不壞命若諸衆生愛已身命求樂離苦

名聞富貴乃至解脫應如是學一切衆生無非我親
我若爲飲食故奪親精氣若節節支解若山頂樹上
高閣深河推令墮落及與毒藥若遣起屍惡鬼相害
若作厭蠱若斷飲食若以刀劍斬其身首隨其方便
斷彼命根若加此苦是義不然以是因緣我於久遠
生死流轉不被衆生奪其精氣無能支解及斷命根
以是義故名不壞命此是布施清淨平等復次布施
清淨平等者憐愍一切諸衆生故爲之積集功德智
慧除諸幻見精進堅固求一切善如說能行不爲活
命而起惡心於諸衆生不起害意所持禁戒與衆生

同見衆生樂深生歡喜於已樂緣自能知足所愛之事皆悉能捨於諸勝法無悋惜心常怖三界忍力自在信無常相如說修行於已失機能自觀察見他失機則生悲愍修善無厭有罪勤懺無邊迴向樂求正理常於衆生作福田想勤爲衆生令息惡道於一切法心無所住此是世諦布施清淨平等我今當說第一義諦布施清淨平等爾時世尊而說呪曰

多地也他 夜咩夜咩 鉢囉佉夜咩 憂鉢囉佉夜咩 夜寐 耶夜咩 佉夜夜咩 蘇婆訶
說此法門時八百六十萬緊那羅乾闥婆等遠塵離

垢得法眼淨

爾時世尊復說呪曰

多地也他 瞿竭唎 瞿竭唎 夜婆瞿竭唎 憂

婆夜婆 瞿竭唎 蘇婆訶

爾時世尊復說呪曰

多地也他 陀媿 陀羅媿 陀羅陀媿 憂跋陀

羅 陀羅媿 蘇婆訶

說此法門時九百四十萬夜叉遠塵離垢得法眼淨
爾時世尊復說呪曰

多地也他 阿闍泥 义义阿闍泥 伽义义 阿

闍泥 毛羅阿闍泥 又差 蘇婆訶

說此法門時七千萬龍於遠塵離垢法得勝三昧
爾時世尊復說呪曰

多地也他 訶訶訶訶訶訶 系打婆 訶訶訶

若若若 訶訶訶 蘇婆訶

說此法門時三十那由他百千阿修羅得不忘菩提
心三昧

爾時世尊復說呪曰

多地也他 阿奴那 阿奴那 阿婆那奴那 阿

婆夜梨 阿婆那奴那 蘇婆訶

說此法門時八萬四千頻婆羅鳩槃荼得喜樂三昧

爾時世尊復說呪曰

多地也他 陀伽陀闍 阿婆陀伽陀闍 阿婆陀

伽陀闍闍 健陀健陀闍 蘇婆訶

說此法門時七那由他百千餓鬼毗舍遮富單那迦

吒富單那得電王三昧過諸數量天龍夜叉乃至迦

吒富單那等昔未曾發無上真實菩提心者皆悉發

心此是第一義諦布施清淨平等諸仁者於彼何者

是戒清淨平等若一切世間及出世間所有善道及

涅槃樂戒爲根本以是因緣得住聲聞辟支佛地及

阿耨多羅三藐三菩提果所謂十善業道遠離殺生
偷盜邪淫妄語兩舌惡口綺語貪瞋邪見諸仁者於
彼遠離殺生因緣獲十種功德何等爲十一者於一
切衆生得大無畏二者於諸衆生得大慈心三者得
斷習氣四者無諸病惱五者得壽命長六者非人護
持七者寤寐安隱無諸惡夢八者無有怨家九者不
畏惡道十者得生善道以是遠離殺生善根廻向阿
耨多羅三藐三菩提是人不久證無上智得菩提已
於彼佛土離諸害殺長壽衆生來生其國諸仁者於
彼遠離偷盜因緣獲十種功德何等爲十一者具大

財報二者不共他有三者不共五家四者衆人愛敬
常不厭捨五者遠遊十方無有疑慮六者行處無畏
七者常樂布施八者不求財寶自然速得九者得財
卽施十者得生善道以是遠離偷盜善根廻向阿耨
多羅三藐三菩提得菩提已彼佛國土具足種種花
果樹林衣服瓔珞莊嚴之具珍奇寶物無不充滿諸
仁者於彼遠離邪淫因緣獲十種功德何等爲十一
者得攝諸根律儀二者得住離欲清淨三者不惱於
他四者衆人稱譽五者衆人樂觀六者能發精進七
者見生死過八者常樂捨施九者常樂求法十者得

生善道以是遠離邪婬善根迴向阿耨多羅三藐三
菩提得菩提已彼佛國土無有腥臭亦無女人不行
婬欲皆悉化生諸仁者於彼遠離妄語因緣獲十種
功德何等爲十一者衆人信語二者於一切處乃至
諸天發言得中三者口出香氣如優鉢羅花四者於
人天衆獨作證明五者衆人愛敬離諸疑惑六者常
出實語七者心意清淨八者常無誦語言不失機九
者常多歡喜十者得生善道以是遠離妄語善根迴
向阿耨多羅三藐三菩提得菩提已彼佛國土無有
腥臭種種妙香芬馨遍滿諸仁者於彼遠離兩舌因

緣獲十種功德何等爲十一者得身不壞二者得眷
屬不壞三者得交友不壞四者得信不壞五者得法
不壞六者得律儀不壞七者得奢摩他不壞八者得
三昧不壞九者得忍不壞十者得生善道以是遠離
兩舌善根迴向阿耨多羅三藐三菩提得菩提已彼
佛國土衆生眷屬不爲諸魔他人所壞諸仁者於彼
遠離惡口因緣獲十種功德何等爲十一者言音柔
輒二者語辭流利三者言音潤澤四者得和合語五
者言必得中六者得質直語七者得無畏語八者得
不誦語九者得如法語十者得生善道以是遠離惡

經

大分卷九集月藏經卷五

二

庚五

經

大分卷九集月藏經卷五

三

庚五

口善根迴向阿耨多羅三藐三菩提得菩提已彼佛
國土法音充滿遠離一切鄙惡言辭諸仁者於彼遠
離綺語因緣獲十種功德何等爲十一者天人愛敬
二者天人隨喜讚歎三者常樂實語四者常與明人
共住不離五者聞言悉領六者得智慧人愛敬尊重
七者常得愛樂阿蘭若處八者愛樂賢聖默然九者
遠離惡人親近賢聖十者得生善道以是遠離綺語
善根迴向阿耨多羅三藐三菩提得菩提已於彼佛
土顏容端正強記不忘樂遠離者來生其國諸仁者
於彼遠離貪欲因緣獲十種功德何等爲十一者身

根不缺二者口業清淨三者心不散亂四者得勝果
報五者得大富貴六者衆人樂觀七者得不壞眷屬
及不壞財八者常與明人相會九者不離法聲十者
得生善道以是遠離貪欲善根迴向阿耨多羅三藐
三菩提得菩提已彼佛國土離彼魔怨及諸外道諸
仁者於彼遠離瞋恚因緣獲十種功德何等爲十一
者得離瞋恚二者不樂積財三者隨順賢聖四者常
與賢聖相會五者得利益事六者面部端嚴七者見
衆生樂則生歡喜八者常得三昧九者三業調柔十
者得生善道以是遠離瞋恚善根迴向阿耨多羅三

藐三菩提得菩提已彼佛國土所有衆生悉得三昧
心極清淨諸仁者於彼遠離邪見因緣獲十種功德
何等爲十一者心性柔善伴侶賢良二者信有業報
乃至奪命不起諸惡三者歸敬三寶不信天神四者
得於正見不擇歲次日月吉凶五者常生人天離諸
惡道六者得賢善心明人讚譽七者棄於世俗常求
聖道八者離斷常見信因緣法九者常與正信正行
正發心人共相會遇十者得生善道以是遠離邪見
善根迴向阿耨多羅三藐三菩提是人速滿六波羅
蜜於善淨佛土而成正覺得菩提已於彼佛土功德

智慧一切善根莊嚴衆生來生其國不信天神離惡
道畏於彼命終還生善道諸仁者於彼布施清淨平
等行時於戒遠離殺生平等行以是因緣具大果報
離諸怖畏諸仁者於彼布施清淨平等行時於戒遠
離偷盜平等行以是因緣具大果報不共他有修一
切善無有留難諸仁者於彼布施清淨平等行時於
戒遠離邪淫平等行以是因緣具大果報修習善根
無有留難無邪淫念觀自他婦諸仁者於彼布施清
淨平等行時於戒遠離妄語平等行以是因緣具大
果報若被毀謗人不信受如說修行發意所爲莫不

堅固於天人衆獨作證明口出香氣如優鉢羅花諸
仁者於彼布施清淨平等行時於戒遠離兩舌平等
行以是因緣具大果報得不壞眷屬丈夫眷屬敬信
眷屬諸仁者於彼布施清淨平等行時於戒遠離惡
口平等行以是因緣具大果報離麤獷語得微妙音
具足清淨離弊惡聲諸仁者於彼布施清淨平等行
時於戒遠離綺語平等行以是因緣具大果報發言
得中斷大眾疑衆人樂見諸仁者於彼布施清淨平
等行時於戒遠離貪欲平等行以是因緣具大果報
正受其報還能捨施具受勝報備大威力諸仁者於

彼布施清淨平等行時於戒遠離瞋恚平等行以是
因緣具大果報端正豐美衆人愛敬一切無礙諸根
不缺諸仁者於彼布施清淨平等行時於戒遠離邪
見平等行以是因緣具大果報正見國土正見家生
常值諸佛及諸菩薩聲聞緣覺見佛聞法供養衆僧
修菩薩行常不捨離清淨平等諸仁者此是戒行清
淨平等以是戒行自莊嚴者是人不久具足相好成
佛功德音聲清淨降伏魔怨禪念慧行清淨大智大
慈大悲乃至能成一切佛法清淨平等此是世間起
發戒行清淨平等諸仁者於彼何者是出世間起發

戒行清淨平等若戒清淨及三摩提起信解行者不
依色事而持禁戒不依受想行識事而持禁戒不依
眼事而持禁戒不依色眼識眼觸眼觸因緣生受愛
取有生事而持禁戒乃至不依意事而持禁戒不依
法意識意觸意觸因緣生受愛取有生事而持禁戒
不依地界水風界事而持禁戒不依無邊虛空處
無邊識處無所有處非想非非想處事而持禁戒不
依欲界色無色界事而持禁戒不依現在及未來事
而持禁戒不依聲聞及辟支佛無上大乘一切智事
而持禁戒不依聞事禪事智事而持禁戒不依聞力

三昧力陀羅尼力忍辱力事而持禁戒不依有漏無
漏力有爲無爲事善不善力明闇力事而持禁戒此
是出世間起發戒行清淨平等梵路聖道入無畏城
彼諸賢聖所依戒行清淨平等第一義諦入清淨智
諸仁者所言戒者是何句義譬如金剛鐵圍山間熱
惱之風以山障故不令得去至四天下如是聖戒清
淨平等修四念處力能障彼愛熱之風不令得起以
是義故名之爲戒譬如鐵圍山間臭穢之風以山障
故不令得去至四天下如是聖戒清淨平等修四無
畏力能障彼邪臭之氣不令得起以是義故名之爲

戒譬如鐵圍山間甚大黑闇以山障故不令得暄此
四天下如是聖戒清淨平等修七覺分力能障彼無
明有爲有漏之相不令得起以是義故名之爲戒諸
仁者離欲義是戒義解脫義是戒義休息義是戒義
盡義是戒義滅義是戒義此諸句義名爲戒義諸仁
者此是有爲無爲戒行清淨平等若有沙門及婆羅
門修此有爲及無爲戒平等住者彼人應受世間供
養若世間人於彼沙門及婆羅門敬信尊重護持養
育衣服飲食牀褥臥具病患因緣施其湯藥活命之
具彼人流轉於生死中恒受勝報速能得人無畏大

城諸仁者於彼何者是忍清淨平等忍有二種一者
捨忍二者息怒忍捨忍清淨平等者若欲得一切樂
捨一切苦是名捨忍清淨平等若有衆生求樂離苦
觀彼三界一切苦道及煩惱火之所逼熱唯除聖人
是人爲已生大怖畏作是見時三界衆生皆爲煩惱
熾然逼熱一一衆生種種苦害驅馳流轉不能自救
如是我共一切衆生爲苦所惱以何方而能自救
卽作是念不以餘事唯應修忍脫一切苦具一切樂
便能喜樂修平等忍能捨種種資身之具所謂飲食
騎乘衣服臥具屋宅牀榻隨其所須皆悉給與以忍

布施爲滅諸苦是人數數修忍住時能行捨施於正
發心人正修行人應到其所而修供養數供養故從
彼人聞生死過患涅槃功德是人如是若聲聞乘及
緣覺乘無上大乘發心求證爲彼樂故重復樂忍養
育衆生此是捨忍清淨平等乃至若捨身外資財能
自忍苦令他得樂亦名捨忍清淨平等若彼種種形
色種種威儀種種音聲種種瞋怒罵辱欺凌麤獷非
實不喜之言乞士來求諸如是等是人心未柔軟瞋
恚未淨不得住忍是入生念誰能勝我是故被辱未
能行忍復作是念彼食血肉夜叉羅刹鳩槃荼餓鬼

毗舍遮富單那迦吒富單那等何故未聞生死大苦
涅槃至樂不觀後世可怖畏事衆苦所惱未能解脫
應知彼等離善知識及不聞法是故生死爲苦所溺
我已近善知識數數得聞生死苦惱涅槃安樂觀後
世畏常勤修習斷一切苦當得度彼生死沉淪何故
起瞋而不行忍是故我應作是分別罵辱音聲及諸
違事皆悉如風我當棄捨不應起瞋如是應捨諸衆
生想作是念時罵辱音聲及諸違事悉如風過離衆
生想修行忍辱清淨平等是人若數於彼衆生捨種
種想罵辱聲音及諸違事離分別想修行忍辱清淨

平等是人住忍心喜得淨如是則能修無礙智謂法無礙及義無礙如是則能悉捨內財所謂皮肉筋骨眼耳鼻舌手足及頭所愛之命如是菩薩摩訶薩修無分別非無分別忍清淨平等是名捨忍清淨平等諸仁者於彼何者是息怒忍清淨平等若菩薩摩訶薩能於一切言語音聲文字捨分別想及於一切色身形想舉動威儀去來戲笑捨分別想亦捨愛取不求果報離於苦樂無分別想乃至於已身命無分別想得住第一義忍清淨平等譬如虛空遇闇不暝得明不喜不作如是分別之心如是菩薩摩訶薩住第

一義忍清淨平等於彼一切有爲諸法語言形色及苦樂受離於分別不作分別不暝不喜於諸衆生離分別想得住第一義忍清淨平等譬如虛空不動不止遍動不震不止遍震如是菩薩摩訶薩於一切業有爲諸行身心不動不止遍動亦復不震不止遍震譬如虛空清淨離垢如是菩薩摩訶薩住第一義忍清淨平等於彼一切有爲身心善得清淨譬如虛空長養衆生如是菩薩摩訶薩住第一義忍清淨平等養育衆生譬如虛空非劫盡火所能燒壞非劫盡水及劫盡風所能毀壞如是菩薩摩訶薩住第一義忍

清淨平等乃至未到無上菩提不爲貪欲瞋恚愚癡
三毒熾火燒壞其心譬如清淨虛空十五日夜極圓
滿月普放冷光熱惱衆生身心涼樂如是菩薩摩訶
薩住第一義忍清淨平等皆息已身威儀憂惱亦息
衆生諸煩惱熱譬如清淨虛空十五日夜極圓滿月
衆星圍繞照四天下如是菩薩摩訶薩住第一義忍
清淨平等隨所住處爲諸天龍乃至迦吒富單那等
之所圍繞暉顯照曜譬如清淨虛空十五日夜極圓
滿月照海島上月愛摩尼從彼珠中流出大水能滿
大海如是菩薩摩訶薩住第一義忍清淨平等以第

一義忍清淨平等放勝光明照曜一切諸天及龍夜
叉羅刹乃至迦吒富單那等令彼悉得善心清淨於
諸衆生起大慈悲心深利益心休息苦惱心令住一
切樂心觀後世畏心離一切惡心於一切善起勤進
心彼諸鬼神以得如是諸勝善心次第漸離一切不
善一切善水悉皆充足故能流滿涅槃大海諸仁者
應當觀此菩薩善根雖未能至究竟處所以住第一
義忍清淨平等故已得超過一切聲聞及辟支佛能
以善法成熟衆生如我昔作忍辱仙人常在林中食
諸甘果時有國王名曰迦利支解我身而爲八段我

者見三界陰爲究竟空及見界入爲究竟空以是義故名之爲忍清淨者謂以聖慧除淨三界諸煩惱道業道苦道以是義故名爲清淨平等者謂以聖慧於三界行一切法理真如實際得如實知無煩惱道業道苦道以是義故名爲平等此是菩薩摩訶薩第一義忍清淨平等諸仁者於彼何者是精進清淨平等以此精進能與布施清淨平等作因乃至能與般若波羅蜜清淨平等作因以是則能捨一切見以此精進能與四念處清淨平等作因超過一切聲聞緣覺以此精進能與四正勤四如意足作因以是則能捨

諸煩惱以此精進能與四攝事四無礙辯四梵住四無色定五根五力七覺支八聖道分九次第定斷十二有支得如來十力十八不共法大慈大悲般若波羅蜜清淨平等而作因緣以此精進能與成熟衆生清淨平等作因以此精進爲得無量佛勝法故集諸善根以此精進能習無量巧方便智無量願智轉轉殊勝修習無量大功德聚以此精進隨願受生教化利益以精進故居兜率天宮觀其時節捨彼宮殿正知了了而入母胎以精進故於藍毗尼林從母右脅安隱而出以精進故行七步已震動大地及諸山海

以精進故受彼難陀及婆難陀龍王兄弟淋水洗浴
以精進故童子遊戲示現一切工巧竒能以精進故
處在宮中五欲不染以精進故夜半踰城向閑林下
以精進故詣優陀迦迦羅茶迦羅摩諸仙人所而修
供養以精進故六年修彼難行苦行以精進故得阿
耨多羅三藐三菩提以精進故轉大法輪無量人天
得證聖道是名精進清淨平等諸仁者我以是精進
今於佉羅帝山牟尼諸仙所依住處作此大集十方
所有菩薩摩訶薩有如佛土微塵數衆悉令集此有
如佛土微塵等數諸天及龍夜叉羅刹乾闥婆阿修

羅摩睺羅伽迦樓羅緊那羅鳩槃荼餓鬼毗舍遮富
單那迦吒富單那等悉來大集爲聞法故是名精進
清淨平等諸仁者以四大海水分爲滴數如彼滴數
具修精進清淨平等能令菩薩摩訶薩等滿足毗離
耶波羅蜜是名精進清淨平等
大方等大集月藏經卷第五



金沙居士王訥吾捐資刻此
大方等大集月藏經卷第五 計字八千七百
五十三箇 該銀五兩二錢五分二厘 伏
願生生契悟妙心世世嘗聞正法
丙戌年七月 日識

テ
卅九
四十三